

Pɔɔlu kadasi bo i kɛɛ fa maari
ROMAFOM
 ni

¹ Mini Pɔɔlu sukɛɛ ahin kadasi n fa ma am a. M ti Yesu Kristo akɔɔ ɔ, ye wɔ fere m ka m kaaki i jaramasa, na wɔ yi m ka m kan labari kpa n bo i fite Nyɛmɛ dɔ n jɔɛ. ² Nyini labari kpa n ye Nyɛmɛ yo seeri ka i fá ma ya n a, na wɔ ma i nɔaniɛ kanfɔm akɛɛ i n̄usu jɔɛ ase i jɔɛ kadasi n nu. ³ Nyini labari kpa n kere ya i Wa n jɔɛ wɔ, nzen ya niɛ i fa kɔ i adamande dɛɛ woowa su, bu yo wuuri i fiteeri Fɛmɛ Davidi dɛɛ busu n nu n wɔ. ⁴ Ama, kabo Nyɛmɛ faari i yiko tengeeri i yiwee nu ni, nyini ma Awiɛwiɛ Casi n kere ka i ti Nyɛmɛ Wa a, yiri la ya Mibiɛ Yesu Kristo ni. ⁵ Yiri dɛɛ ti, ma di Nyɛmɛ ahɔɔɔma, ye wɔ ma ma yo i jaramasa, adena i duma n dɛɛ ti, na m ma daanfiɛ barasu kɛɛ de i nɔaniɛ ni, na bu yo i yarada. ⁶ Ambɛɛ Romafom gusu, am wo nyini minɛm bo Nyɛmɛ afere bu n nu wɔ, ka am kaaki Yesu Kristo dɛɛ minɛm. ⁷ Tɔ, ambɛɛ bo am wo Roma miɛ kpiri n nu ni, ye m sukɛɛ ahin kadasi n ma am a. Ambɛɛ bo Nyɛmɛ koro am na wɔ fere am na am ayo i dɛɛ minɛm ni, ya Si Nyɛmɛ ni ya Mibiɛ Yesu Kristo ma am wura bu ahɔɔɔma nu na am nya ahoreda.

Kabo má Pɔɔlu koroori ka i kɔ niɛ Romafom busu ni ⁸ Ciciri su, Yesu Kristo dɛɛ ti, m da m Nyɛmɛ asi ma am kɛɛ, dama durunya n nufom kɛɛ ati kabo am ayo Yesu Kristo yarada ni. ⁹ Nyɛmɛ bo m su i ni m ahorembaa kun ni, na m kan i Wa n labari kpa n jɔɛ ni, yiri di m daani a, kabo m nati sere Nyɛmɛ ma am ni. ¹⁰ Saŋga kɛɛ m sere i wɔ, ka nzen i ti i dɛɛ koroyanu, i teke atin ma m kisa, na i awieeri su na m koro ba niɛ am busu. ¹¹ Dama

m nyunu aboro ka m bá ñu am wɔ, adena m fa aceeri n bo i fite Awiewie Casi n dɔ ba ma am na am koro jina fanga kenken ni nyemesu ni. ¹² Nahɔre, i ti deke bo ya fa ma ya beɱgu na ya nya ahoresi wɔ, m ni ambere kere, kabo ya yo Yesu yarada n dɛɛ ti.

¹³ M ninbaam, m koro ka am si ka sanɱa kere, má m koro ka m bá niɛ am busu wɔ, ama, m nya má atin. Má m koro ka m ba nya minɛ am nu ma Nyemɛ wɔ, kabo ma nya am beɱgu nbem bo bu ti má Yudafom ni. ¹⁴ Dama wɔ yo daka ka m yo sɔ ma minɛ barasu kere, bo bu nyunu ateke, ni bo bu nyunu ateke má, ni bo ba sɔnsɔn kara, ni bo ba sɔnsɔn má kara. ¹⁵ Nyini dɛɛ ti, ye m ahore abi ka m ba kan labari kpa n jɔre kere ambere gusu bo am wo Roma miɛ kpiri n nu n a.

Yiko bo i wo labari kpa n nu ni

¹⁶ Nyinsɛ ti má m fa kɔ labari kpa n su, dama yiri ti Nyemɛ yiko bo i ma sɔnɔ kere bo i yo yarada n nya tiide a, bo bu ti Yudafom ni du mɔ a, na bo bu ti má Yudafom n nya tɔ su. ¹⁷ Labari kpa n kere kabo Nyemɛ de sɔnɔ ka i yo sa bo i kɔ atin su i dɔ a. Sɔnɔ kere bo i yo yarada, i fite i yaradayo n dɛɛ ti ye Nyemɛ de i mi ka i yo sa bo i kɔ atin su i dɔ a, na nyini ma i yarada n yo biiwa. Kabo ba kere i Nyemɛ Jɔre Kadasi n nu ka, Nyemɛ ña, “Sɔnɔ bo i yo sa bo i kɔ atin su m dɔ, i nyá ñgɔɔ, i yarada n dɛɛ ti.”

Kabo adamande kere ayo satie ni

¹⁸ Nyemɛ wo angoro akere kabo wɔ fa yaa acin minɛm sui ni, bere bo bu sunsunni ti tie na bu yo satie ni, bu satie n dɛɛ ti, ba kete ka má minɛm si Nyemɛ nahɔre su. ¹⁹ Deke bo i ti na wɔ fa yaa n la ka, ba ñu deke n kere bo i ma bu si Nyemɛ ni, dama yiri ni i tii ayi i kpain afite fofoe nu. ²⁰ Fite sanɱa bo Nyemɛ yiiri durunya n ba juuri ni kisa, minɛ anu i woowa, i ti má ka bu nyumbaa anu

i kabo i ti barasu wɔ, ama, ba ɲu dekem bo wɔ yi bu ni. Nyini dekem ni kere ka i ti Nyɛmɛ nahɔrɛ su a, ni kabo i la yiko bo i la má awieeri ni. Nyini ti, be wo má bɛrɛ bo i koro se ka i si má i. ²¹ Haari ni bo bu si i n kɛrɛ, ba kete ka bu ma má i jirima ka i ti Nyɛmɛ, na bu kaaki da má i asi. Nyini dɛɛ ti, ye bu sunsunni kɛrɛ aka ɲgbɛɛn ye ɲɔnlɛ akpiɛ bu su, ye bu ahorembaa ayo biri n a. ²² Bu bu bu ɲu ka bu ti ɲɔnlɛfɔm wɔ, ama, bu ti sinnzinm wɔ. ²³ Jirima bo má bu fa ma Nyɛmɛ bo i wo bɛrɛ sanɲa kɛrɛ ni, ba fa ama amɔɛm bo ba yo bu na bu ferema ni adamandem, ni lanɲkɛtɛfɔm, ni ajaannam, ni cinbukunnusufɔm wɔ.

²⁴ Nyini dɛɛ ti, ye Nyɛmɛ ayaki bu ye bu yo bu kunnu koroowa n a, na bu suyo dangba sam bu ɲuɲu nu suwura bu ɲu nyinɛ. ²⁵ Dama ba kete Nyɛmɛ nahɔrɛfɔ ni, na bu nya susu kɔrɛ su. Na bu su dekem bo Nyɛmɛ ayi bu ni, bu su má yiri bo i yiiri deke n kɛrɛ ni. Yiri dɛɛ la kansi sanɲa kɛrɛ a. Ami. ²⁶ Ba kete Nyɛmɛ n dɛɛ ti, ye wɔ yaki bu a, na bu suyo nyinɛ sam kabo bu kunnu koro n a, haari na nbaram yaki nbiɛsɔm dɔ daari, na bu sufa bu beɲgu nbaram da, na bu yo kabo má wɔ yo má daka ka bu yo ni. ²⁷ Na nbiɛsɔm n gusu yaki nbaram dɔ daari, na bu la konviki agaya fa kɔ bu beɲgu nbiɛsɔm dɔ, na bu ni bɛrɛ sanɲa da ka bara ni biɛsɔ dɛɛ su. Nyini nyinɛ sam dɛɛ ti, ye ba nya suicin kabo wɔ yo daka ka bu nya i n a.

²⁸ Kabo ba kete ka bu si má Nyɛmɛ ni, nyini ma wɔ yaki bu, ye bu sunsunni tiɛ n ma bu yo sa bo má wɔ yo má daka ka bu yo i n a. ²⁹ Bu ahorembaa ayi ni satiɛ barasu kɛrɛ ɲgumi wɔ, bu konviki wura bu beɲgu neɲgem nu wɔ, na bu suyo bu beɲgum tiɛ, na bu susi bu beɲgum kɔrɛ, na bu sukun bu beɲgum, na bu sudi aluwa, na bu sudadaka bu beɲgum, na bu sukɔ bu beɲgum, na bu sukan bu beɲgum jɔrɛ, ³⁰ na bu susaaki bu beɲgum duma, na bu sukɔ Nyɛmɛ, na bu sukpiɛ bu beɲgum nzukɔ, na bu la

karambani, na bu sufɔ, na bu susunsun kabo bu yo na bu yo satiem, na bu sukete bu wufom nɔaniɛ, ³¹ na bu la má ngɔnlɛ, na bu yo má sa bo ba se ka bu yo i ni, na bu koro má minɛm, na bu si má bu beɔgum aɔunfo. ³² Bu si kabo Nyɛmɛ akere ka, sɔnɔ kɛɛ bo i nati yo sɔ, wɔ yo daka ka i mi wú ni, haari ni nyini mmɔɔ, bu toko yo nyini sam wɔ, ama, bo i kɔ tara i kɛɛ n la ka, bu jina minɛ bo bu gusu nati yo nyini sam ni sin wɔ.

2

Kabo Nyɛmɛ bá di sɔnɔ kɛɛ jɔɛ barasu ni

¹ Tɔ, wɔɔ kɛɛ bo a kan nyini minɛm jɔɛ ni, a la má kabo a yo na a kan fite nu Nyɛmɛ dɔ. Dama jɔɛ n bo a kan jaraki u beɔgu na wɔɔ ni u tii yo nyini sam ni, nyini ma a kan jaraki u ɔu n a. ² Ya si kabo Nyɛmɛ di minɛm kɛɛ bo bu yo sɔ n jɔɛ, na i jaraki bu ni, i jɔɛ diiwa n ti nahɔɛ wɔ. ³ Ye wɔɔ kɛɛ bo a kan minɛm n bo bu yo nyini sam n jɔɛ jaraki bu, na wɔɔ mmɔɔ ni u tii yo sɔ ni, a sunsun ka a koro fite Nyɛmɛ jɔɛ diiwa n nu, nzen sɛ? ⁴ Kabo Nyɛmɛ ayo sakpa bambaka ama u na i la mindi ni sawɔɛ ni, nzu ti ye a bu i ngbɛɛn a? A si má ka deke bo i ti na i yoori nyini sakpa n la ka, i koro ka a kaaki u wo wɔ, nzen sɛ? ⁵ Ama, kabo a yo u ahorembaa kekereke na a kete ka a kaaki má u wo ni, a sukɔpini suicin ma u ɔu wɔ lɛɛ, cɛɛn n bo Nyɛmɛ bá di minɛm jɔɛ nahɔɛ su, na i cín bu sui na sɔnɔ kɛɛ ɔú i ni. ⁶ Na i tɔ sɔnɔ kɛɛ ɔkato kabo i sayoowa ti barasu. ⁷ Minɛ nbem dɛɛ la ka, bu mindi nati yo sakpa, na bu kpini kansɛ, ni jirima, ni aɔuniɛmbaa bo i kpɔɔ má n busu ni, bɛɛ ye Nyɛmɛ má bu ngɔɔ bo i la má awieeri n a. ⁸ Ama, minɛm bo bu nati yo anyii sam, na bu kete deke kɛɛ bo i kɔ atin su Nyɛmɛ dɔ, na bu su satie atin su ni, bɛɛ ye Nyɛmɛ fá yaa bu ɔu na i cín bu sui n a. ⁹ Minɛm kɛɛ bo bu nati yo satie ni, bu dí

wahara na bu n̄ú anyumboro, bo bu ti Yudafom ni dú m̄o n̄u nyini kekereke n a, na bo bu ti má Yudafom gusu nyá t̄o su. ¹⁰ Ama, min̄em k̄ere bo bu nati yo sakpa ni, Nyeme má bu nya kansi ni jirima ni ahoreda, bo bu ti Yudafom ni dú m̄o nya nyini deke kpam n a, na bo bu ti má Yudafom n gusu nyá t̄o su. ¹¹ Dama Nyeme tambu má nu.

¹² Min̄em k̄ere bo bu la má Nyeme n̄oanīe kpamaawa n na bu yoori satīe, bu ká ngb̄een, haari ni bo bu la má Nyeme n̄oanīe kpamaawa n ni. Na min̄em k̄ere bo bu la Nyeme n̄oanīe kpamaawa n na bu yoori satīe, b̄ere ye Nyeme fá i n̄oanīe kpamaawa n di bu j̄ore, na i bó bu asi a. ¹³ Má min̄em bo bu sui ti Nyeme n̄oanīe kpamaawa ni ye Nyeme de bu ka bu yo sa bo i k̄o atin su i d̄o a. Ama, bo bu yo kabo Nyeme n̄oanīe kpamaawa n kere ni, b̄ere ye Nyeme de bu ka bu yo sa bo i k̄o atin su i d̄o a. ¹⁴ Min̄em bo bu ti má Yudafom na bu la má Nyeme n̄oanīe kpamaawa ni, ama, na bu yo kabo n̄oanīe n kere ni, bu sunsunni ni bu ahorembaa kpa n d̄ee ti, b̄ere ni bu tii akpama n̄oanīe ama bu n̄u l̄ee. ¹⁵ Kabo ba de i s̄o ni, nyini kere ka Nyeme n̄oanīe kpamaawa n wo bu ahore su a, na bu sunsunni gusu kere ka i ti s̄o o, na i kaaki j̄araki bu ka ba yo sa bo i k̄o má atin su, wara i koro jina bu sin ka ba yo sa bo i k̄o atin su. ¹⁶ Nyini k̄ere yó c̄een bo Nyeme má Yesu Kristo ba di adamande k̄ere j̄ore bo i wo asiri nu n w̄o. M labari kpa n bo m kan i kere min̄e ni, kabo m kere i l̄ee.

Yudafom ni Nyeme n̄oanīe kpamaawa n j̄ore

¹⁷ Amb̄ere bo am n̄a am ti Yudafom, na am daafi Nyeme n̄oanīe kpamaawa n n̄u, na am fa f̄o ka am si Nyeme ni, ¹⁸ na am si kabo Nyeme koroowa ti, na am sunsun nyunyumi, na am yi sa bo i ti kpa, dama am asi Nyeme n̄oanīe kpamaawa n k̄ere awie, ¹⁹ am yo am n̄u ka amb̄ere

bita anyinsinm kpama a, na am ti wein ma minEM bo bu wo awosin nu ni. ²⁰ Am ɲa ambERE teke minEM bo bu la má ɲɔnlE nyi a, na am kaaki kere minEM bo bu ti ka nbaatumam ni, dama am ɲa am si NyEME nɔaniE kpamaawa n dEE ti, am sunsun ka am si ɲɔnlE ni nahɔRE kERE bo i wo i nu ni. ²¹ AmbERE bo am kere minEM ni, nzu ti ye am kere má am ɲu a? Ye ambERE bo am se minEM ka má bu wɔ ni, am wɔ, nZEN am wɔ má? ²² Am ɲa má be saaki ajaa ciire ni, ye am saaki i, nZEN am saaki má i? Am ɲa am koro má amɔE jɔRE ni, ye am wɔ neɲgem amɔE sɔɔm n nu, nZEN am wɔ má? ²³ AmbERE bo am bita NyEME nɔaniE kpamaawa n fa fɔ ka am si i, na am su má i su ni, ambERE kaaki wura NyEME nyinsE a. ²⁴ Kabo ba kERE i NyEME JɔRE Kadasi n nu ni, ka, “AmbERE YudafOM dEE ti, ye minEM bo bu ti má YudafOM jɔjɔ wura NyEME ɲgasi nu a.”

²⁵ NZEN am yo kabo NyEME nɔaniE kpamaawa n kere ka am yo ni, nyini yiri, am kENkENNE n bo am awura i n la kPERE. Ama, nZEN am yo má kabo nɔaniE kpamaawa n kere ni, i ti ka am awura má kENkENNE lEE. ²⁶ NZEN bo ba wura má kENkENNE n yo kabo NyEME nɔaniE kpamaawa n kere ka bu yo ni, NyEME de bu ka ba wura kENkENNE wɔ lEE. ²⁷ Nyini ti, i sukere ka, bERE n bo ba wura má kENkENNE na bu yo kabo NyEME nɔaniE kpamaawa n kere ni, bu dí ambERE YudafOM jɔRE jaraɲi am, dama am awura kENkENNE na am la nɔaniE kpamaawa ni, ama, am yo má kabo i kere ni. ²⁸ Dama má YudafOM bo ba wura kENkENNE aɲuniEmbaa su ni ɲgumi ti YudafOM nahɔRE su a. ²⁹ Ama, sɔnɔ bo i ti YudafOM nahɔRE su la bo wɔ kaaki wo i ahorembaa su ni, na kENkENNE wuraawa nahɔRE su fite ahorembaa su wɔ, NyEME Awiewie ni kaaki sɔnɔ a, má nɔaniE kpamaawa ni. Nyini sɔnɔ sɔ, NyEME kansi i a, má adamande.

3

¹ Tɔ, bo bu ti Yudafom ni, bu la nzu kpere wo? Ye kenkenne wura buka nzu wo? ² Nahore, Yudafom tara minem bo bu ti ma Yudafom ni deke dogu nu. Ciciri su, Nyeme du mo faari i nɔaniem n wuraari bere saa nu a, ka bu nie i su. ³ Ye nzen Nyeme fa wuraari bere saa nu a, ye bu nbem ayo ma yarada, nyini kere ka Nyeme la ma dabuɔ lɛɛ, nzen se? ⁴ Ai, ma so. Haari ni bo sɔno kere ti korɛfom ni, Nyeme yiri ti i nahorefo ɔ, kabo ba kere i Nyeme Jore Kadasi n nu ni, ka,

“Deke bo a kan ni, bu nu ka nyini ti nahore a,

na nzen bu di u jore jarakiiri u, a kuma bu.”

⁵⁻⁶ Ye nzen ya satiem n bo ya yo bu n kere kabo Nyeme yo sa bo i ko atin su, na i cin ya sui, ya koro se ka wo yo ma sakpa, nzen se? Ai, ma so. Adamande sunsunni lɛɛ. Nzen Nyeme yo ma sa bo i ko atin su, i yo se koro di durunya n nufom jore a? ⁷ Be koro se ka nzen m bu kore, na i ma minem nu kabo Nyeme nahore ti barasu, adena bu ma i jirima, ye nzu ti ye i di m jore cin m sui ka m ti satiyofom a? ⁸ I ti kabo mine nbem nati kan wo, bu na, am ma ya yo satie adena Nyeme ba ma i kaaki sakpa. Bu kpie m nzuko ka mini mmo se so ɔ. Bu bu kore wo. Nyeme di bu jore na i cin bu sui.

Be wo ma bere bo i yo sa bo i ko atin su sanga kere

⁹ Tɔ, ya se se wo? Yere bo ya ti Yudafom ni, ya tara bo bu ti ma Yudafom n nzu nu wo? Ai, ya tara ma bu pui, dama ma du mo ase am ka yere Yudafom ni, ni bo bu ti ma Yudafom n kere ti satiyofom wo. ¹⁰ Kabo ba kere i Nyeme Jore Kadasi n nu ni, ka,

“Be wo ma bere bo i yo sa bo i ko atin su, haari sɔno kun n kpein mmoɔ.

¹¹ Be wo ma bere bo i la ngɔnle,

be wo ma bere bo i niɛnie Nyeme busu.

¹² SONO KERE akaaki bu sin abo NYEME dEE atin ni, bu
 KERE aka ngbeen,
 be wo má bERE bo i yo sakpa,
 haari SONO kun n kpein mmOO wo má bERE.”

¹³ Ba kaaki akERE ka,
 “Bu konvi ti ka fanKunma bo ba teke i su wO,
 na bu fa bu taferema sudadaka minEM.”
 “Na jORE bo i fite bu nOO nu yo ya ka pumpuni bORE wO.”

¹⁴ “NzukOLEE ni jORE tiE ngumi fite bu nOO nu a.”

¹⁵ “Bu CE má na bu yi minE ngOO ndende.

¹⁶ Deke KERE bu kO, bu dEE la ka bu yo minEM
 ngbeenngbeen,
 na bu saaki bu.

¹⁷ Bu dEE la ka bu nati sukpini jORE, bu koro má tana-
 laifiE.”

¹⁸ “Bu nyunu yi má NYEME, nyini dEE ti, bu soro
 má i.”

¹⁹ Ya si ka deke n KERE bo ba KERE i NYEME nOaniE
 kpamaawa n nu ni, i jOjO ni YudafoM bo bu su i su n wO,
 adena má be koro teke i nOO kan jORE be, ama, durunya n
 nufOM KERE bá jina NYEME nyunu na i dí bu jORE na i cín
 bu sui. ²⁰ Dama be wo má bERE bo i koro se ka i su nOaniE
 kpamaawa n su dEE ti, ye NYEME de i ka i yo sa bo i kO
 atin su i dO a, ama, nOaniE kpamaawa ni ma minEM si ka
 bu ti satiEyofoM a.

Kabo NYEME ña SONO yo sa bo i kO atin su i dO ni

²¹ Ama, kisa NYEME ayi akere ya kabo ya yo sa bo i kO
 atin su i dO, má yiri la bo ya su nOaniE kpamaawa n su
 ni, ama, yiri la bo nOaniE kpamaawa n ni NYEME nOaniE
 kanfoM diiri i ñusu daani ka i yO n wO. ²² Yiri la ka, SONO
 KERE bo wO yo Yesu Kristo yarada, yiri ye NYEME ña i yo
 sa bo i kO atin su i dO a, nyini ti, ya la má kpakpaakinu,
²³ dama SONO KERE ayo satiE afun NYEME jirima woowa

ni, ²⁴ ama, Yesu Kristo ade sɔnɔ kɛrɛ tii aji, nyini dɛɛ ti ye Nyɛmɛ ɲa sɔnɔ kɛrɛ ayo sa bo i kɔ atin su i dɔ n a, i ti Nyɛmɛ aceeri wɔ. ²⁵⁻²⁶ Yiri Yesu ye Nyɛmɛ ma i deerɪ adamande jinaabiri n a, na wɔ fa i ɲu ayo yoowa na wɔ wu, adena nzɛn minɛm yoori i yarada, i mbunja n dɛɛ ti, Nyɛmɛ fá bu satie ce bu. Deke bo i ti na Nyɛmɛ yoori sɔ n la ka, i koro ka i kere kabo yiri ni i tii yo sa bo i kɔ atin su n wɔ, dama dawa sanɲa Nyɛmɛ yo laari sawɔrɛ fa kɔ minɛm bo bu yo satie n dɔ. Ama, kisa wɔ kere ka yiri ni i tii yo sa bo i kɔ atin su wɔ, na sɔnɔ kɛrɛ bo i yoori Yesu yarada, Nyɛmɛ de i mi ka yiri yo sa bo i kɔ atin su i dɔ a.

²⁷ Nyini dɛɛ ti, nzu deke ye ya koro fa fɔ a? Deke be wo má bɛrɛ. Nɔaniɛ kpamaawa ni ma minɛm yo sa bo i kɔ atin su Nyɛmɛ dɔ a, nzɛn sɛ? Ai, má sɔ. Ama, bo minɛm yo Yesu yarada n dɛɛ ti a. ²⁸ Ya niɛ ka deke bo i kere ka Nyɛmɛ de sɔnɔ ka i yo sa bo i kɔ atin su i dɔ n la kabo wɔ yo Yesu yarada n wɔ, má ka i su nɔaniɛ kpamaawa n su n dɛɛ ti a. ²⁹ I ti nahɔrɛ wɔ, ka Nyɛmɛ ti má Yudafoɔm ɲgumi Nyɛmɛ, i ti bo bu ti má Yudafoɔm n gusu Nyɛmɛ wɔ. ³⁰ Nyɛmɛ ti kun wɔ. Yarada n dɛɛ ti, ye Nyɛmɛ ɲa Yudafoɔm bo ba wura kɛnkɛnnɛ n yo sa bo i kɔ atin su i dɔ a, ye minɛm bo bu ti má Yudafoɔm na bu wura má kɛnkɛnnɛ ni, bu yarada ma Nyɛmɛ de bu ka bu yo sa bo i kɔ atin su i dɔ a. ³¹ Nyini sukere má ka ya yo Yesu yarada n dɛɛ ti, ya fa má nɔaniɛ kpamaawa n yo má juma a. I ti má sɔ, ama, nyini ma ya bita nɔaniɛ kpamaawa n kenken a.

4

Kabo Abraham yoori Nyɛmɛ yarada barasu ni

¹ Tɔ, am ma ya niɛ ya na Abraham jɔrɛ. Ya busu nu, yiri ti ya kɛrɛ na a. ² Nzɛn má i sakpa yoowa dɛɛ ti ye Nyɛmɛ ade i ka i yo sa bo i kɔ atin su i dɔ, má i koro fa fɔ yanfoya,

ama, Nyeme do, i ti ma so. ³ Dama ba kere i Nyeme jore Kadasi n nu ka, “Abraham yoori Nyeme yarada, nyini de ti ye Nyeme ade i ka i yo sa bo i ko atin su i do n a.” ⁴ Nzen sɔnɔ yo juma na ba to i kaari, i ti ma ka bu na ba ce i aceeri wo, i ti i juma ni hkatɔɔ. ⁵ Ama, sɔnɔ bo i yoori yarada, ma ka i sakpa bo wo yo i n de ti ye Nyeme ade i ka i yo sa bo i ko atin su i do n a, ama, wo yo yarada ka Nyeme de satieyofɔ ka i yo sa bo i ko atin su i do n de ti a. ⁶ Feme Davidi mmɔɔ yo kaanri nyini minem nusu jore, ka i mi la terefie, dama Nyeme ade i ka i yo sa bo i ko atin su i do, ma ka i sakpa n de ti a. I na,

⁷ “Terefie wo bu do, minem bo Nyeme fa bu ngasi ce bu ni.

Terefie wo bu do, minem bo Nyeme kata bu satie su ni.

⁸ Terefiefo la sɔnɔ bo Micera n na i la ma satie be ni.”

⁹ To, minem bo bu wuraari kenkenne n ngumi la nyini terefie ni, nzen se a? Ai, minem bo bu wura ma kenkenne ni mmɔɔ la i. Dama ya du mo ase ka, Abraham yarada n de ti ye Nyeme ade i ka i yo sa bo i ko atin su i do n a. ¹⁰ Sanga bonɔ ye Nyeme seeri so n a? Nyini sanga Abraham awura kenkenne, nzen wo nya wura ma? Ai, nyini sanga wo nya wura ma. ¹¹ Nyini sanga n sin, ye i ba wuraari kenkenne n a. Na i kenkenne wuraawa n kere ka i yarada n de ti ye Nyeme deeri i ka i yo sa bo i ko atin su i do, sanga bo i nya wura ma kenkenne ni. I yoori so ni, adena yiri Abraham ba yo minem bo ba yo yarada n kere si, haari ni bo ba wura ma kenkenne ni, ye Nyeme ade bu ka bu yo sa bo i ko atin su i do n a. ¹² Yiri gusu kaaki ti minem bo ba wura kenkenne n si a, ma ka ba wura kenkenne n de ti, ama, bo ba yo yarada kabo i yoori yarada sanga bo i nya wura ma kenkenne ni.

¹³ Nyeme yo seeri Abraham ni i busu nufom ka i fa durunya n kere ce bu ni, ma ka i su Nyeme nonie

kpamaawa n su dɛɛ ti a, ama, kabo wɔ yo Nyɛmɛ yarada n ti ye Nyɛmɛ deeri i ka i yo sa bo i kɔ atin n su i dɔ a. ¹⁴ Nzɛn minɛ su Nyɛmɛ nɔaniɛ kpamaawa n su ye bu nya deke n bo Nyɛmɛ seeri ka i cé bu ni, nyini la ka yaradayo n ti ɲgbɛɛn wɔ lɛɛ, na kabo Nyɛmɛ ase n gusu la má kperɛ. ¹⁵ Nzɛn minɛm saaki nɔaniɛ kpamaawa ni, nyini ma Nyɛmɛ fa yaa na i cin bu sui a, ama, nzɛn má nɔaniɛ kpamaawa be wo má bɛɛɛ, má deke be wo má bɛɛɛ bo i kere ka sɔnɔ ayo satɛɛ.

¹⁶ Nyini ti, deke bo Nyɛmɛ yo seeri ka i fá ma ni, i baari minɛm bo bu yo yarada n dɛɛ ti wɔ. I yoori sɔ ni, adena deke n bo i yo seeri ka i yó n yó aceeri kpama ma Abraham busu nufom kɛɛɛ, má bo bu su nɔaniɛ n kpamaawa n su ɲgumi, ama, bo ba yo yarada kabo Abraham yoori ni. Yiri ti ya kɛɛɛ si a, ¹⁷ kabo ba kɛɛɛ i Nyɛmɛ Jɔɛ Kadasi n nu ni, ka, Nyɛmɛ ɲa o, “M má a yo minɛ barasu dɔɲgu si.” Nyɛmɛ ɲuuri ka Abraham ayo yarada ka yiri Nyɛmɛ tenge minɛm bo ba wu n yiwee nu, na yiri ma deke n bo i yo wo má bɛɛɛ n wo bɛɛɛ a. ¹⁸ Nyini ti, sanɲa bo Abraham yoori yarada na i la tama ni, i ti kekereke na i yo tama ka i bá yo minɛ barasu dɔɲgu si, kabo ba kɛɛɛ i Nyɛmɛ Jɔɛ Kadasi n nu ka, “U busu nufom bá sunnu beberebe ni.” ¹⁹ Haari ni sanɲa bo wɔ ju afɔ yaa, na i si ka wɔ yo kpiɛn ni, na i yi Saara ti ɲɔɔka na wɔ yo buke n kɛɛɛ ni, i ɲuniɛ ayɔɔki má i, i yoori yarada a. ²⁰ Wɔ yo má sika fa kɔ deke bo Nyɛmɛ seeri ka i yó i n su, ama, yarada n bo i yoori i n dɛɛ ti, na wɔ nya fanɲa na wɔ kansi Nyɛmɛ. ²¹ Na wɔ si tenle su ka Nyɛmɛ koro yo deke n bo i yo seeri ka i yó i ni. ²² Abraham yoori yarada a, nyini dɛɛ ti ye Nyɛmɛ ade i ka i yo sa bo i kɔ atin su i dɔ n a. ²³ Kabo ba kɛɛɛ i ka, Nyɛmɛ ade i ka i yo sa bo i kɔ atin su i dɔ ni, má Abraham ɲgumi dɛɛ ti ye bu kɛɛɛri i sɔ a, ²⁴ ama, yɛɛɛ gusu dɛɛ ti ye bu kɛɛɛri sɔ n a, yɛɛɛ bo Nyɛmɛ bá de ya ka ya yo sa

bo i kɔ atin su i dɔ n na ya yo i yarada ni, yiri bo i tengeeri ya MibiE Yesu i yiwee n nu ni. ²⁵ Ya satiE dEe ti ye Yesu wuuri a, na wɔ tenge i yiwee n nu, adena NyEMe de ya ka ya yo sa bo i kɔ atin su i dɔ.

5

Kabo NyEMe ade ya ka ya yo sa bo i kɔ atin su ni

¹ Tɔ, ya yo yarada, na NyEMe ade ya ka ya yo sa bo i kɔ atin su i dɔ ni, ye ya ni yiri afiEn ayo dɔŋgu a, ya MibiE Yesu Kristo dEe ti. ² Yesu Kristo dEe ti ma ya la atin jina deke bo ya wo kisa n a, yiri la NyEMe ahɔɔma n bo wɔ fa ama ya ni, na ya la ahorejɔ, dama ya la tama ka ya nyá NyEMe dEe jirima woowa n be. ³ Na nZEn ya gusu la ahorejɔ sanɔa bo ya di wahara, ya si ka wahara di ni ma ya mindi a. ⁴ NZEn ya la mindi, nyini ma ya la wo kpa a, nZEn ya la wo kpa, nyini ma ya la tama a. ⁵ Na tama n bo ya la i ni, i ma ya di má nyinsE, dama NyEMe afa i AwiEwiE Casi n ama ya, yiri ma ya si ya ahore su kabo NyEMe koro ya agaya barasu a.

⁶ Sanɔa bo ya la má fanɔa mmɔɔ ni, nyini sanɔa n ye Kristo ba wu maari satiEyofom n a. ⁷ I ti kekereke ka sɔnɔ soro su na i tɔ i ŋɔɔ na i wu ma sɔnɔ bo i yo sa bo i kɔ atin su, ama, beni, be koro fa ahoresi na i soro su na i de sɔnɔ bo i yo sakpa agaya jinaabiri na i wu ma i. ⁸ Ama, NyEMe yiri akere ya kabo i koro ya barasu, dama sanɔa bo ya toko yo satiEm ni, ye Kristo ba wu maari ya a. ⁹ Nyini dEe ti, i yiwee n bo i wu maari ya ni, ye NyEMe ade ya ka ya yo sa bo i kɔ atin su i dɔ n a, nyini ti, i ti nahɔɔE wɔ ka i dé ya fite sucin n bo NyEMe fá cin satiEyofom ni. ¹⁰ Sanɔa bo ya yo ti NyEMe kpɔfom ni, ye i wa Yesu wu maari ya n a, na wɔ yo ya ni NyEMe afiEn dɔŋgu, kisa na ya ni NyEMe afiEn ayo dɔŋgu ni, i dé ya tii ji nahɔɔE su, dama Yesu la ŋɔɔ n dEe ti. ¹¹ Má nyini ŋgumi a, ama, ya

la ahorejo na ya bo tuntun Nyeme ya MibiE Yesu Kristo dEE ti, dama wo yo ya ni Nyeme afien dongu.

Adam ni Yesu Kristo jore

¹² Am ma ya tenge ya kERE na Adam jore su. Yiri sono kun dEE sa bo i yoori i ni faari satie baari durunya n nu a, ye satie n gusu faari yiwee ba kuunri sono kERE n a, dama sono kERE yo satie wo. ¹³ Satie yo woori durunya n nu ka, ye Nyeme nya ba faari i naniE kpamaawa n maari a, ama, sangha bo Nyeme nya fa ma i naniE kpamaawa n ma ma ni, minEM yo kan ma satie jore, dama naniE kpamaawa be wo ma bere n dEE ti. ¹⁴ Ama, haari nyini mmoo, fite Adam sangha n kERE ko ju Moyisi sangha ni, yiwee la yiko kun minEM so o, haari ni bo ba yo ma satie kabo Adam yoori ni. Adam woowa kere ya deke be fa ko yiri n bo i ba n jore a.

¹⁵ Ama, aceeri n bo Nyeme afa ama ya ni, i ti ma ka Adam dEE satie ni. Sano kun satie dEE ti ye mine dongu wuuri a, ama, deke bo i tara i kERE n la ka, mine dongu anya ahorma bambaka, i ti aceeri bo i fite Nyeme do o, sano kun ahorma dEE ti. Yiri la Yesu Kristo. ¹⁶ Bekun, Nyeme aceeri n ti ma ka sano kun n dEE satie ni, dama sano kun n dEE satie ni, nyini ma Nyeme di mine jore cin bu sui a, ama, mine dongu satie bo ba yo i n dEE sin, ye Nyeme ace bu aceeri a, na wo de bu ka bu yo sa bo i ko atin su i do. ¹⁷ Ya nu ka sano kun dEE satie ti, ye yiwee la yiko kun mine so n a, yiri sano kun n satie dEE ti. Ama, deke bo i tara i kERE n la kabo mine anya hoo adi femeya n wo, dama ba nya ahorma bambaka n bo i ti Nyeme aceeri ni, Nyeme ade bu ka bu yo sa bo i ko atin su i do a. I kERE fite sano kun n dEE ti wo, yiri la Yesu Kristo.

¹⁸ Nyini ti, kabo sano kun dEE satie ti na Nyeme di minEM kERE jore cin bu sui ni, so bekun ye sano kun

dEE sakpayo ni ma NyEME de minEM kERE ka bu yo sa bo i kO atin su i dO na bu nya ngOO a. ¹⁹ Na kabo sONO kun keteeri NyEME nOaniE n na minEM kERE ayo satieyofOM ni, sO bekun ye sONO kun gusu ade NyEME nOaniE n a, nyini ye NyEME de minEM kERE ka bu yo sa bo i kO atin su i dO a. ²⁰ NyEME faari i nOaniE kpamaawa n kereeri a, na minE si kabo satieyo asunnu barasu a, ama, deke bo satieyo sunnu, NyEME ahOROMA n bo wO fa ama n sunnu tara sO. ²¹ Nyini ti, kabo satie la yiko na i ma yiwee kun minEM sO ni, sO ye NyEME ahOROMA n dEE ti, ye i de minEM ka bu yo sa bo i kO atin su i dO a, na bu nya ngOO bo i la má awieeri a, ya MibiE Yesu Kristo dEE ti.

6

Yesu Kristo dEE ti ya la ngOO

¹ TO, ye ya se sE wO? Ya koro kO su suyo satie, adena NyEME ahOROMA buka su, nZEN sE? ² Ai. I koro yo má sO. I ti ka ya ti minEM bo ba du mO awu wO, fa kO satie su. Ye nzu ti ye ya toko yo satie bekun a? ³ Am si má NyEME nzue n biE n bu wO? YERE bo bu biEERI ya NyEME nzue ni, ya ni Yesu Kristo ayo kun lEE, na ya ni yiri asanga awu yiwee kun lEE. ⁴ Sanga bo bu biEERI ya NyEME nzue ni, i ti ka ya ni Yesu asanga awu, na ba kaaki ase ya ni yiri wO lEE. Na kabo ya Si NyEME YikofO n tengeeri Yesu i yiwee nu ni, sO ye i má ya gusu nya nyini ngOO fOFORE n a.

⁵ Ya ti kabo i ti n wO, sanga bo i wuuri ni, sO ye wO yo daka ka ya bá ti kabo i ti n a, i yiwee tenge n nu. ⁶ Ya si ka, ya woowa dawa ni, ba sanga akpama i ni Kristo i baka jaanu n su, adena má ya yo akOOM fa kO satie su kun, dama anjuniEmbaa n bo i yo satie n wo má bERE kun. ⁷ Dama sONO kERE bo wO wu, wO de i tii afite satie nu lEE. ⁸ TO, kabo ya ni Kristo sanga wuuri ni, sO ye ya yo yarada ka ya ni yiri sanga nya ngOO a. ⁹ Ya si ka Kristo tengeeri i

yiwee n nu ni, i wú má kun, dama yiwee la má i ηusu yiko kun. ¹⁰ Yiwee n bo i wuuri ni, i wuuri kpekun n kpein wɔ, na i yi satie, ama, ηgɔɔ n bo i la i ni, i wo Nyeme dɛɛ wo wɔ. ¹¹ Sɔ ye i ti ye ni ka ambere ni am tii si ka am awu fa kɔ satie su a, na am ni Yesu ayo kun, ye am la ηgɔɔ wo Nyeme dɛɛ wo a.

¹² Nyini ti, má am ma satie la yiko fa kɔ am ηuniɛmbaa n su, na am yo am kunnu koroowa. ¹³ Má am fa am ηuniɛmbaa be ma satie, na i kaaki deke bo i yo satie, ama, am fa am ηu ma Nyeme ka minɛm bo ba teηge yiwee nu anya ηgɔɔ kisa, na am fa am ηuniɛmbaa n kere ma Nyeme na i fa am yo deke bo i yo sa bo i kɔ atin su. ¹⁴ Satie la má yiko fa kɔ am dɔ, dama Nyeme nɔaniɛ kpamaawa n niɛ má am su kun, ama, Nyeme ahɔɔma ni niɛ am su a.

Minɛm bo ba kaaki sa bo i kɔ atin su akɔɔm

¹⁵ Tɔ, nzu bekun a? Kisa, Nyeme nɔaniɛ kpamaawa n niɛ má ya su kun, ama, Nyeme ahɔɔma ni niɛ ya su a. Nyini ti, ya koro yo satie, nzɛn sɛ? Ai, má sɔ. ¹⁶ Am si ka nzɛn am faari am ηu maari be na am deeri i mi nɔaniɛ, am ti i mi n akɔɔ ɔ lɛɛ. Kabo i nya ti sɔ ni, nzɛn am faari am ηu maari satie, am ti satie akɔɔ ɔ, na am wú ɔ lɛɛ. Ama, nzɛn am gusu deeri Nyeme nɔaniɛ ni, i dé am ka am ayo sa bo i kɔ atin su i dɔ ɔ lɛɛ. ¹⁷ Sanɔa be am yo ti satie akɔɔm wɔ, ama, kisa ya da Nyeme asi ka Nyeme nɔaniɛ n bo bu fa kereeri am, na am ade i ni am ahorembaa kere ni, ¹⁸ am ade am tii afite satie nu lɛɛ, am akaaki sa bo i kɔ atin su n akɔɔm wɔ. ¹⁹ M fa adamande dɛɛ woowa, ye m fa kere kabɔ Nyeme ti a, dama am suti má i bu. Am yo fa am ηuniɛmbaa n be yoori danɔba sam wɔ, ni satie barasum wɔ, nyini ma am saaki nɔaniɛ kpamaawa n a, sɔ ye kisa am fa am ηuniɛmbaam yo sa bo i kɔ atin su, nyini ma am yo Nyeme minɛ casim a.

²⁰ Saŋga bo am yo ti satie akoom ni, be miε má am ka am yo sa bo i kō atin su. ²¹ Satiεm bo am yo yoori bu ni, nzu kpεε ye am nyaari i a? Pui. Kisa, bu ti am nyinse wō, na i awieeri kεε la yiwee wō. ²² Ama, kisa na am ade am tii afite satie nu, na am ayo Nyεmε akoom ni, kpεε bo am anya i ni, yiri la bo am ayo i minε casim ni, na i awieeri, am nyá ηgōō bo i la má awieeri ni. ²³ Dama satie ηkatō la yiwee wō, ama, Nyεmε aceeri n bo wō fa ama ya n la ηgōō bo i la má awieeri na i wo ya Mibiε Yesu Kristo nu n wō.

7

Ajaa woowa kere kabo atin fōfōre n ti barasu a

¹ Tō, m ninbaam, m sujōjō ambεε bo am si nōaniε kpamaawa ni dō a. Am si má ka nzεn sōnō toko la ηgōō, ye nōaniε kpamaawa n niε i su a? Ama, i nya wu wieeri, i koro niε má i su kun. ² Ya fa i ka, nzεn bara aja, na i hun toko la ηgōō, nōaniε kpamaawa n ma má atin ka i yaki i ajaa, ama, nzεn i hun n nya wuuri, i la atin bo i koro kō ja biεsō fōfōre. ³ Nyini ti, nzεn i hun n toko la ηgōō na i kō jaari biεsō fōfōre, bu fére i ka bara bo wō saaki ajaa ciire wō, ama, nzεn i hun n awu ye i kō jaari biεsō fōfōre, nōaniε kpamaawa n ma i atin wō, wō saaki má ajaa ciire lεε. ⁴ Tō, nyini ti, m ninbaam, i ti sō ō lεε, ambεε mmōō dō. Kabo am ni Kristo ayo kun na wō wu ni, bu saŋga kuunri am ni yiri wō lεε. Nyini ti, nōaniε kpamaawa n niε má am su kun, nyini ma am la atin na am kaaki be dεem n a. Nyini la ka, am ti Kristo dεem wō lεε, yiri bo i tengeeri i yiwee n nu ni. Deke n bo i ti na i yo sō n la ka, ya koro yo sakpa ma Nyεmε. ⁵ Saŋga bo ya yo su ya adamande woowa su ni, ya koroowa la ka, ya sufa ya ηuniεmbaam suyo satie, nōaniε kpamaawa n dεε ti. Nyini satie n awieeri la yiwee wō. ⁶ Ama, kisa, ya nya ya

tii afite nɔaniɛ kpamaawa n bo i yo niɛ ya su ni, dama ya wu wɔ. Nyini ti, ya su Nyɛmɛ wɔ, ya su má atin dawa n bo i su nɔaniɛ kpamaawa n bo ba kɛɛ ase n su, ama, ya su Nyɛmɛ ni atin fɔfɔrɛ n bo Awiewiɛ Casi n afa ama ya ni su a.

Kabo nɔaniɛ kpamaawa n ma minɛ yo satieɛ barasu ni
⁷ Tɔ, ye ya se sɛ wɔ? Ya koro se ka nɔaniɛ kpamaawa n ti satieɛ, nzɛn sɛ? Ai, má sɔ. Nzɛn má nɔaniɛ kpamaawa n awo má bɛɛ, má m si má kabo satieɛ ti. Dama nzɛn má nɔaniɛ kpamaawa n ase má ka, “Má a ma u konviki wura be dɛɛ nɛŋge nu,” má m si má ka nzɛn u konviki wuraari be dɛɛ nɛŋge nu, i ti satieɛ wɔ. ⁸ Nɔaniɛ maawa n bo i seeri sɔ n dɛɛ ti, satieɛ anya atin m ahore su, nyini ma m la konviki barasu barasu fa kɔ minɛm nɛŋge nu n a. Nyini kere ka nzɛn nɔaniɛ kpamaawa n wo má bɛɛ, satieɛ la má yiko, i ti ka deke bo wɔ wu wɔ. ⁹ Saŋga be m yo la ŋgɔɔ ɔ, na m si má nɔaniɛ kpamaawa n jɔrɛ, ama, saŋga bo nɔaniɛ maawa n baari ni, na wɔ ye satieɛ su m ahore su, ¹⁰ na ma wu. Na ma ŋu ka nɔaniɛ maawa n bo má i ma ŋgɔɔ ni, mini dɔ, i faari yiwee baari a. ¹¹ Nɔaniɛ maawa n dɛɛ ti, ye satieɛ anya atin awura m ahore su adadaka m, ye i kun m a. ¹² Nyini kɛɛ kere ka nɔaniɛ kpamaawa n ni i tii, ti deke kpa fite Nyɛmɛ dɔ ɔ, na nɔaniɛ maawa kun kun n kɛɛ ti deke kpa a, na i kere sa bo i kɔ atin su.

¹³ Nyini ti, nɔaniɛ kpamaawa n bo i ti kpa ni, wɔ ma ma wu wɔ, nzɛn sɛ? Ai, má sɔ. Ama, satieɛ fa nyini nɔaniɛ kpa n su wɔ, ye i ma m wu a, adena satieɛ kere kabo i ti barasu nahɔrɛ su, na nɔaniɛ maawa n ma minɛm si kabo satieɛ ti deke tiɛ agaya ni.

Woowa barasu nnyɔ bo i wo adamande nu ni

¹⁴ Ya si ka nɔaniɛ kpamaawa n ti awiewiɛ jɔrɛ wɔ, ama, mini yiri, m bita adamande dɛɛ woowa a, na m ti satieɛ

akoo. ¹⁵ Sam bo m yo bu ni, m koro si má deke n bo i ti na m yo bu ni, dama deke n bo m koro ka m yo bu ni, m yo má nyini, ama, deke n bo m kpoo bu ni, m yo nyini wo. ¹⁶ Nyini ti, nzEn m yoori satie be, na m koro má i, ma soro su ka noaniE kpamaawa n ti kpa wo lEe. ¹⁷ Ma nu ka má m koroyanu ye m yo nyini satiem n a, ama, satie n bo i wo m ahore su ni ma m yo so a. ¹⁸ M si ka woowa n bo m bita i ni, i ti má kpa haari kaan so, i ti adamande woowa a, nyini ti, sakpayo wo m ahore su, ama, m koro yo má i. ¹⁹ M koro ka m yo sakpa, ama, m koro yo má i, satie n bo m koro má ka m yo i ni, m yo nyini wo. ²⁰ Satie n bo m yo bu na m koro má ka m yo bu ni, nyini la ka, má mini ni m tii yo bu a, ama, satie n bo i wo m ahore su ni yo bu a.

²¹ Ma nu ka nyini jore n ti nahore wo, ka, sanja kere bo m koro ka m yo sakpa, nyini sanja ye m yo satie a. ²² Dama m sunsunni ni m ahore su, m koro Nyeme noaniE kpamaawa ni. ²³ Ama, ma nu ka noaniE barasu be wo m huniembaa n kere nu, nyini noaniE tie n kun lue ni noaniE kpamaawa n bo i wo m sunsunni ni m ahore su n wo, na i kunma m huniembaa n kere nu, na i tara m nyi m. ²⁴ Oi. Mini anunfofo so. Hma de m tii ji a, na i yi m fite ahin adamande huniembaa n nu a, bo i sucin m ko yiwee n nu, na m ka ngbeen n a? ²⁵ M da Nyeme asi, dama wo de m tii aji, ya Mibie Yesu Kristo dee ti.

To, mini do, m sunsunni ni m ahore su, m su Nyeme noaniE kpamaawa n su wo, ama, m adamande dee woowa su, m su satie atin su wo.

8

Minem bo bu woowa ti kabo Awiewie Casi n koro ni

¹ Nyini ti, kisa, sooo kere bo i ni Yesu Kristo ayo kun, Nyeme di má i jore cin má i sui. ² Dama Awiewie Casi n dee noaniE kpamaawa n bo i ma ya ngoo, na i fite Yesu

Kristo do ni, ade u tii aji, na wo yi u afite noaniε kpamaawa n bo i ma a yo satie na a wu n nu ni. ³ Nyini noaniε kpamaawa n la ma fanga, dama adamande anuniεmbaa woowa n ayoroki. Deke bo noaniε kpamaawa n akoro ayo ma i ni, Nyeme ayo i, yiri la bo i sunmaari i tiεngu Wa durunya n nu fen, ni anuniεmbaa bo i ferema ni adamande dee n bo i yo satie ni, na wo di satie bo i wo adamande huniε n nu n jore, na wo yo i ngbeen. ⁴ Deke bo i ti na Nyeme yoori so n la ka, adena ya yo sa bo i ko atin su kabo noaniε kpamaawa n kereeri ni, dama yere, ya su ma adamande anuniεmbaa woowa n atin su kun, ama, ya su awiewie n dee atin ni su a. ⁵ Minem kere bo bu su adamande anuniεmbaa woowa n atin su ni, bu sunsunni kere wo adamande sa koroowa su wo, ama, minem bo bu su Awiewie Casi n dee atin n su ni, bu sunsunni kere wo Awiewie Casi n jore su wo. ⁶ Bo i sunsunni wo adamande anuniεmbaa woowa n su, i mi wu o, ama, bo i sunsunni wo Awiewie Casi n jore su, i mi nya ngoo, na i nya ahoreda. ⁷ Dama sono kere bo i sunsunni kere wo adamande anuniεmbaa woowa n su ni, i mi ti Nyeme krofo o, i de ma Nyeme noaniε kpamaawa ni, i koro de ma i wo mmoo fieo, ⁸ na bo i su adamande dee anuniεmbaa woowa n su ni, i koro yo ma sa bo i sun Nyeme nu.

⁹ Ama, ambere yiri, am su ma adamande anuniεmbaa woowa n atin n su, am su Awiewie Casi n dee atin ni su a, dama Awiewie Casi n wo am nu n wo. Ama, sono kere bo i la ma Kristo Awiewie ni, i mi ti ma Kristo dee. ¹⁰ Ama, ambere bo Kristo wo am do ni, am huniεmbaa n ba wu wo, satie dee ti, ama, Awiewie Casi ni ama am ngoo, dama Nyeme do, i de am ka am yo sa bo i ko atin su wo. ¹¹ Nahore su, Nyeme tengeeri Yesu i yiwee n nu, nyini ti, nzen i Awiewie Casi n wo am nu, haari am huniεmbaa wuuri mmoo, i tenge i kabo i tengeeri Yesu i

yiwee n nu n wɔ, dama i Awiɛwiɛ n wo am nu n dɛɛ ti.

¹² Nyini dɛɛ ti, m ninbaam, ya di kaari, má yɛɛ adamande aɲuniɛmbaa woowa n su dɛɛ kaari, bo má ya fa su yɛɛ adamande aɲuniɛmbaa woowa n atin su ni.

¹³ Dama nɛn am su adamande dɛɛ aɲuniɛmbaa woowa n atin su, am wú wɔ lɛɛ, ama, nɛn am ma Awiɛwiɛ Casi n bukaari am, na am yakiiri adamande aɲuniɛmbaa woowa ni, am nyá ɲɔɔ. ¹⁴ Minɛm kɛɛ bo bu ma Nyɛmɛ Awiɛwiɛ n kere bu atin, bɛɛ ti Nyɛmɛ nbaam a. ¹⁵ Dama Awiɛwiɛ Casi n bo am ade i ni, i yaki má am na am kaaki yo akɔɔm kun na am soro sɛɛ, ama, yiri ma am yo Nyɛmɛ nbaam a, na yiri ma am koro bo fere Nyɛmɛ ka, “Abba,” i bu la ka, “M Si.” ¹⁶ Awiɛwiɛ Casi n ni i tii buka ya dɛɛ awiɛwiɛ n ye i di daani ya ahore su se ka ya ti Nyɛmɛ nbaam a. ¹⁷ Kabo ya ti Nyɛmɛ nbaam ni, ya nyá deke n bo Nyɛmɛ ase ka i fá ma i minɛm ni, na ya ni Yesu Kristo gusu sánɲa nya deke n bo Nyɛmɛ ase ka i fá ma i minɛm n a. Nɛn ya ni yiri sánɲa diiri wahara, ya ni yiri gusu sánɲa nya i jirima woowa ni.

Kabo ya woowa bá ti kabo Nyɛmɛ dɛɛ n ti ni

¹⁸ M sunsun ka wahara n bo ya sudi i kisa ni, i ti má pui, ya koro fa má i sunsun má jirima woowa n bo Nyɛmɛ bá yi i kere ya ni. ¹⁹ Deke n kɛɛ bo Nyɛmɛ ayi bu n ɲminda ni anyumboro wɔ, na bu bá ɲu kabo Nyɛmɛ yí i nbaam fite fofoe n nu. ²⁰ Dama deke n kɛɛ bo Nyɛmɛ ayi bu n wo bɛɛ wɔ, bu la má kpɛɛ, má ka bɛɛ koro sɔ a, ama, Nyɛmɛ ma bu la má kpɛɛ a. Deke bo i ti na i yo sɔ n la ka, i la tama ²¹ ka deke n kɛɛ bo wɔ yi bu ni, bu nyá bu tii, na má bu yo akɔɔm kun, na bu wu na bu kpɔɔ, ama, na bu nyá tiide ni jirima woowa kabo Nyɛmɛ nbaam kɛɛ nya i barasu ni. ²² Ya si ka deke n kɛɛ bo Nyɛmɛ ayi bu ni, wo waraki ni yaari nu wɔ, haari ni kisa, kabo bara ba suwu baa na i di yaari ni. ²³ Má deke n bo Nyɛmɛ ayi bu ni ɲgumi

wo waraki su a, ama, yERE mmoo bo ya de i Awiewie bo i ti ciciri su aceeri ni, ya wo waraki su sunminda ni anyumboro wo, ka NyEME ba fa ya yo i nbaam, na i de ya nyuniE ni. ²⁴ Tiide n bo ya nya i ni, nyini ma ya la tama n a. NZEN a la deke, a se ma ka a la tama ka a nya i. Deke bo sONO la i, i se ma ka i la i tama. ²⁵ Ama, NZEN ya la tama ka ya nya deke be na ya nya nya ma i, ya mindi nminda ni anyumboro wo, na ya ba nya i.

²⁶ I ti so lEE, sangga kERE bo ya yOROKI na ya si ma kabo ya yo ni, Awiewie Casi n ba buka ya, beni, ya si ma kabo ya sere NyEME barasu, ama, Awiewie Casi n ni i tii waraki so o sere NyEME ma ya, ni waraki bo adamande koro joo ma i. ²⁷ NyEME fiiti adamande ahorembaa su na i si kabo i ti barasu a, yiri si deke bo i wo i Awiewie Casi n sunsunni nu a, dama Awiewie Casi n su kabo NyEME koro ni su a, na i sere NyEME ma i minEM. ²⁸ Ya si ka NyEME wo minEM bo bu koro i n do, na i buka bu, adena i yo deke kERE dongu ma bu, bERE la minEM bo i du mo seseeri su ka i fere bu ni, na wo fere bu. ²⁹ NyEME du mo siiri nyini minEM wo, na wo cici ka bu ba yo kabo i Wa n ti ni, nyini ma i Wa n yoori baakpiEN, i nbaam kERE nu n a. ³⁰ NyEME du mo ciciiri nyini n kERE wo ka, na wo nya fere bu, na bERE n bo wo fere bu n ye wo de bu ka bu yo sa bo i ko atin su i do n a, na bERE n bo wo de bu ka bu yo sa bo i ko atin su i do ni, ye wo ma bu i jirima woowa n be n a.

Kabo NyEME akere i koro barasu ni

³¹ To, kisa, ye ya se se wo bekun a, fa ko ahin sam kERE su a? NZEN NyEME wo ya do, nma koro yo ya sa be a? ³² NyEME akete ma ka i fa ma i tiENGU Wa ni mmoo ma ma ya, ama, i faari i maari ya kERE wo. Nyini ti, i yo se kete ka i ma ma ya deke n kERE bo i ti kpa n a? ³³ Nma koro fa jORE fa so NyEME minEM bo wo yi bu n a? Be wo

má bERE, dama NyEME ni i tii ade bu ka bu yo sa bo i kO atin su i dO a. ³⁴ Nyini ti, nma koro di ya jORE cin ya sui a? Be wo má bERE. Dama Kristo ni i tii wuuri wO, nahORE na wO tenge i yiwee n nu, i tana NyEME saa fombORO su, susere i ma ya. ³⁵ Koro n bo Kristo koro ya ni, nzu deke koro kpaaki ya ni yiri a? Ai. Deke be koro kpaaki má ya ni yiri n nu. Kekereke o, wahara o, wuwuruwa o, ahOE o, yaari o, anyumboro o, yiwee o. Deke be wo má bERE bo i koro kpaaki ya ni yiri nu. ³⁶ Dama ba kERE i NyEME JORE Kadasi n nu ka,

“WORO dEE ti, ale kERE bo i cin, bu kun ya sO O,
ya ti ka nbOEM wO, ye bu kpiE ya kOM a.”

³⁷ Haari ni nyini n kERE mmOO ni, ya di nasara a, na ya toko di nasara buka su, Kristo bo i koro ya n dEE ti. ³⁸⁻³⁹ M si tenle su ka, deke be wo má bERE bo i koro kpaaki ya ni koro n bo NyEME koro ya, ya MibiE Yesu Kristo dEE ti ni, yiwee wara ngOO o, merEkEM wara Sitana yikofOM o, deke n bo bu wo bERE o, wara deke n bo bu bá yo o, yiko bo i wo aṅgoro wara asiEN bu o. Deke n bo NyEME ayi bu ni, bu be wo má bERE bo i koro kpaaki koro n bo i wo ya ni Kristo afiEN ni.

9

MinEM bo NyEME afere ayi bu n jORE

¹ TO, deke bo m sukan kere am ni, i ti nahORE wO, m bu má kORE, m ti Kristo dEE wO, AwiEwiE Casi n gusu kere m sunsunni nu a, ye i di daani m ahore su a. ² Yiri la ka, m ahore asaaki agaya, na sanḡa kERE i suyo m yaa ³ fa kO m ninbaa YisarelifOM dEE busu. NZEN má mini ni m tii kaari ngbEEN, na m kpaaki yakiiri Kristo, adena i buka m ninbaam, m dEE tiEṅgu minEM ni, má m koro. ⁴ BERE la YisarelifOM bo NyEME maari bu atin ka bu yo i nbaam, na bu nuuri i jirima woowa ni, na i faari sESesum diiri i

di ni bɛrɛ ni, na i faari nɔaniɛ kpamaawa n maari bu ni, na i kereeri bu kabo bu su i barasu ni, na i seeri ka i yó sakpa beberebe ma bu ni. ⁵ Bu ti ya nam busu nufɔm wɔ, haari Kristo Tiidefɔ n bo Nyɛmɛ sunmaari i na i kaaki adamande baari durunya n nu ni, bu wuuri i fite bu dɛɛ busu n nu wɔ. Kristo Tiidefɔ ni la yiko tara deke n kɛrɛ, yiri ti Nyɛmɛ a, yiri ti ye ni kansi sanɓa kɛrɛ a. Ami.

⁶ I ti má ka Nyɛmɛ nɔaniɛ n ti má nahɔrɛ wɔ, dama má bu kɛrɛ bo bu wuuri bu Yisarelifɔm busu nu ni n ti Yisarelifɔm nahɔrɛ su a. ⁷ Nahɔrɛ, má nbaam kɛrɛ bo Abraham wuuri bu ni ti i nbaam nahɔrɛ su a, ama, Nyɛmɛ yo seeri Abraham ka, “U wa Izaki sinfɔm ɲgumi yó u busu nufɔm a.” ⁸ Nyini la ka, má nbaam kɛrɛ bo Abraham wuuri bu kabo adamande wu nbaam ni ti Nyɛmɛ nbaam nahɔrɛ su a, ama, i nbaam bo Nyɛmɛ seeri ka i wú bu ni ɲgumi, ti i busu nufɔm nahɔrɛ su a. ⁹ Dama kabo Nyɛmɛ yo seeri i n yaa, i ɲa, “Ti fɛn, ɲgɔɔ cɛɛn ka buusɔ, m káaki ba na m bá ɲu ka u yi Saara bita baabiɛsɔ.” ¹⁰ Má nyini ɲgumi a, am tenɓe su ka ya na Izaki yo maari i yi Rɛbɛka akunnu, ye i wuuri ndaam n a. ¹¹⁻¹² Sanɓa bo Rɛbɛka nya wu má i ndaam ni, na bu nya yo má sakpa wara satie be ni, nyini sanɓa n ye Nyɛmɛ seeri i ka, “Baakpiɛn ni bá su baakan n a.” Nyɛmɛ dɛɛ koroyanu ye i yoori sɔ n a, yiri koro i sɔnɔ ye i yiiri i a, má ka bu be sayoowa dɛɛ ti a. ¹³ Kabo ba kɛrɛ i Nyɛmɛ Jɔrɛ Kadasi n nu ni, ka, Nyɛmɛ ɲa,

“Jakɔbu, ye m koro i a,
ama, Isawu yiri, m kpɔ i wɔ.”

¹⁴ Ye ya se sɛ wɔ? Ya koro se ka Nyɛmɛ ayo má sa bo i kɔ atin su, nzɛn sɛ? Ai, ya koro se má sɔ fieo. ¹⁵ Dama Nyɛmɛ yo seeri Moyisi ka,

“Sɔnɔ kɛrɛ bo m koro ka m buka i, m búka i wɔ,

na sɔnɔ kɛrɛ bo m koro ka m si i aɲunfɔ, m sí i aɲunfɔ ɔ.”

¹⁶ Nyini ti, má adamande koroyanu, wara deke bo i boro i nyi yo i ni ti jɔrɛ a, ama, kabo Nyɛmɛ si aɲunfɔ ni, nyini ti jɔrɛ a. ¹⁷ Dama ba kɛrɛ i Nyɛmɛ Jɔrɛ Kadasi n nu ka, Nyɛmɛ yo seeri Ijipiti Fɛmɛ Faaro ka, “Deke n bo i ti na m yiiri u tanaari fɛmɛya biɛ n su n la ka, m kére m yiko u ɲɔɔ su, na m duma tá bara ye durunya n kɛrɛ nu.” ¹⁸ Nyini kɛrɛ kere ka, sɔnɔ kɛrɛ bo Nyɛmɛ koro ka i si i aɲunfɔ, ye i si i mi aɲunfɔ a, na minɛm bo i koro ka i yo bu ahorembaa kekereke ni, na i yo bu.

Nyɛmɛ yaafa ni i aɲunfɔ si n jɔrɛ

¹⁹ Nyini ti, beni, be koro bisa m ka, “Nzɛn i ti sɔ, nzu ti ye Nyɛmɛ di minɛm bo ba kete i n jɔrɛ na i jaraki bu a? ɲma koro kete na i kanda sa bo Nyɛmɛ koro i n a?” ²⁰ M ɲa, wɔɔ la ɲma na a se Nyɛmɛ akuruwa a? Dundu koro bisa má yakati tafɔ n ka, “Nzu ti ye a taari m sɔ a?” ²¹ Yakati tafɔ n la atin bo i fa i yakati n ta dundu bo i sufa yo juma cɛɛn n kɛrɛ cɛɛn, na i kaaki la atin bo i fa be ta dundu bo i fa yo juma cɛɛn kpiri cɛɛn. ²² Nyini ti, Nyɛmɛ la atin bo i koro fa yaa, na minɛm ɲu kabo i yiko ti barasu. I gusu koro mindi agaya fa kɔ minɛm bo bu ma yaa ati i ni, bɛrɛ bo má wɔ yo daka ka bu ka ɲgbɛɛn ni. ²³ Na i gusu la atin bo i fa i jirima woowa bo i la má aɲusu n fa kere minɛm bo wɔ si bu aɲunfɔ ni, na wɔ du mɔ asɛɛ su ka bu bá nya i jirima woowa n be ni. ²⁴ Yɛrɛ la nyini minɛm bo i si ya aɲunfɔ, na ya nya i jirima woowa n be ni, má ka yɛrɛ Yudafom ɲgumi, ye wɔ fere ya nbem a, ama, wɔ fere bo bu ti má Yudafom ni mmɔɔ nbem abuka su. ²⁵ I ti kabo Nyɛmɛ nɔaniɛ kanfɔ Hoseya akɛrɛ i dɛɛ kadasi n nu n wɔ ka, Nyɛmɛ ɲa,
 “Minɛm bo bu yo ti má m minɛm ni, m fére bu ka m minɛm.

Na yiri n bo ma koro má i ni, m fére i ka m sɔnɔ koroowa.

²⁶ Dika n bo i nu na m fereeri bu ka, ‘Am ti má m minɛm ni,’

dɔ ye bu fére bu ka Nyɛmɛ bo i wo bɛrɛ sanɔa kɛrɛ n dɛɛ nbaam n a.”

²⁷ Tɔ, na Nyɛmɛ nɔaniɛ kanfɔ Esaya abo awie fa kɔ Yisarelifom jɔrɛ su, i ŋa, “Haari ni bo Yisarelifom sunnu beberebe ka ŋmiɛ ni, bu nu minɛ kaan sɔ nyá tiide a.

²⁸ Dama sa n bo Micɛra ni yó i durunya n nu ni, i yó i wie ndende.” ²⁹ I ti kabo Esaya du mɔ seeri n wɔ, i ŋa,

“Nzɛn má Micɛra Yikofɔ n ayaki má ya busu nufom nbem, má i yo ya kabo i yoori Sodomfom ni Gomorafom wɔ, miɛ tiɛm bo Nyɛmɛ saaki bu ni.”

Yisarelifom ni labari kpa n jɔrɛ

³⁰ Tɔ, ye ya se sɛ wɔ? Minɛm bo bu ti má Yudafom ni, akpini má atin kabo bu yo sa bo i kɔ atin su Nyɛmɛ dɔ, ama, kisa, Nyɛmɛ ade bu ka bu yo sa bo i kɔ atin su i dɔ, bu yarada n dɛɛ ti. ³¹ Ama, na Yisarelifom bɛrɛ, akpini atin kabo bu su nɔaniɛ kpamaawa n su, adena Nyɛmɛ de bu ka bu yo sa bo i kɔ atin su. Ama, haari ni nyini mmɔɔ, ba koro asu má i su nyunyumi, na bu yo sa bo i kɔ atin su Nyɛmɛ dɔ. ³² Nzu ma i yoori sɔ n a? Dama ba kpini má atin kabo bu yo yarada na Nyɛmɛ de bu ka bu yo sa bo i kɔ atin su i dɔ, ama, bu kpiniiri atin ka bu sayoowa ma Nyɛmɛ de bu ka bu yo sa bo i kɔ atin su i dɔ a. Na ba bo bu jaa yabuɛ n su na ba kpaasi. ³³ Kabo ba du mɔ akɛrɛ i ase ni, Nyɛmɛ ŋa,

“Am ti fɛn, m sufa yabuɛ be se Siyon miɛ kpiri n nu lɛɛ, nyini yabuɛ ni, minɛm bó bu jaa su na bu kpási.

Ama, sɔnɔ kɛrɛ bo i yoori i yarada, i mi dí má nyinsɛ.”

10

¹ M ninbaam, deke bo m koro i m ahore su la ka, m minɛm Yisarelifɔm nya tiide, m nyɛmɛsere lɛɛ saŋga kɛɛ. ² M si tenle su ka bu nyunu aboro ka bu su Nyɛmɛ atin n su nahɔɛ su, ama, bu si má kabo bu yo na bu su i su. ³ Dama bu si má atin bo Nyɛmɛ de minɛm ka ba yo sa bo i kɔ atin su i dɔ ni, ama, bu kpini bu tiɛŋgu atin wɔ, na bu su i su. Nyini ti, na ba kete Nyɛmɛ atin ni, ba de má kabo Nyɛmɛ ɲa bu yo sa bo i kɔ atin su i dɔ ni. ⁴ I ti nahɔɛ wɔ, ka Kristo juma n bo i yoori i ni, yiri kuunri nɔaniɛ kpamaawa n kɛɛ nɔɔ a, adena sɔnɔ kɛɛ bo i yoori i yarada, Nyɛmɛ de i mi ka i yo sa bo i kɔ atin su i dɔ.

Sɔnɔ kɛɛ koro nya tiide

⁵ Moyisi yo kɛɛ fa kɔɔri kabo minɛ koro su nɔaniɛ kpamaawa n su, na bu yo sa bo i kɔ atin su Nyɛmɛ dɔ, i ɲa, “Sɔnɔ kɛɛ bo i su nɔaniɛ kpamaawa n kɛɛ su, i mi nyá ɲɔɔ.” ⁶ Ama, fa kɔ kabo yarada dɛɛ ti, na sɔnɔ yo sa bo i kɔ atin su Nyɛmɛ dɔ ni, i ɲa, “Má a sunsun u ahore su ka, ɲma fún kɔ aŋgoro a?” Nyini la ka, i kó fa Kristo jura ba lɛɛ. ⁷ Wara “ɲma júra kunma ɲɔŋɔ n bo i la má awieeri nu a?” Nyini la ka, i kó fa Kristo fun fite bo ba wum n nu ba lɛɛ. ⁸ Deke bo i suse n la ka, “Nyɛmɛ nɔaniɛ n waari má ni wɔɔ.

I wo u nɔɔ nu, ni u ahorembaa mmɔɔ su.” Yiri la labari n bo ya kaanri i n fa kɔ yaradayo su ni. ⁹ Nzɛn a teke u nɔɔ jɔjɔɔri minɛm nyunu ka, Yesu ti u Mibiɛ nahɔɛ su, na a yoori yarada u ahore su ka Nyɛmɛ tengeeri i yiwee n nu, a nyá tiide. ¹⁰ Dama sɔnɔ kɛɛ bo i yoori yarada i ahore su, ye Nyɛmɛ de i ka i yo sa bo i kɔ atin su i dɔ a. Na sɔnɔ kɛɛ bo i teke i nɔɔ jɔjɔɔri minɛm nyunu ka wɔ yo yarada, nyini ma i nya tiide a. ¹¹ Dama ba kɛɛ i Nyɛmɛ Jɔɛ Kadasi n nu ka, “Sɔnɔ kɛɛ bo i yoori

i yarada, i mi dí má nyinsɛ.” ¹² Nyini ti, bo bu ti Yudafom, ni bo bu ti má Yudafom, bu la má kpakpaakinu, Micɛra kun ni ti bu kɛɛ Mibiɛ a. Yiri ma minɛm kɛɛ bo bu bo fere i duma deke kpa bo i la má aɲusu n a. ¹³ Dama ba kɛɛ i Nyɛmɛ Jɔɛ Kadasi n nu ka, “Sɔnɔ kɛɛ bo i bo fereeri Mibiɛ n duma, i mi nyá tiide.”

¹⁴ Tɔ, bu yo sɛ koro bo fere i duma, má ka ba du mɔ ayo i yarada? Ye bu yo sɛ koro yo i yarada, má ka ba du mɔ ati i jɔɛ? Ye bu yo sɛ koro ti i jɔɛ a, má ka be adu mɔ akan i labari kpa n akere bu? ¹⁵ Ye bu yo sɛ koro kan i labari kpa n kere minɛm a, má ka be asunma bu minɛm dɔ? Kabo ba kɛɛ i Nyɛmɛ Jɔɛ Kadasi n nu, ka, “Bo bu suba kan Nyɛmɛ labari kpa n ma ya ni, bu natiiri yo fiɛ.” ¹⁶ Ama, má sɔnɔ kɛɛ soroori su deeri labari kpa n a, kabo Nyɛmɛ nɔaniɛ kanfɔ Esaya yo seeri ni, ka, “Ya Mibiɛ, ɲma ayo ya labari n yarada? Ai, be ade má i.” ¹⁷ Nyini ti, kana sɔnɔ ba yo Yesu Kristo yarada, má ka wɔ ti i labari kpa n ka, kana sɔnɔ gusu ba ti labari kpa ni, má ka be akan Kristo nɔaniɛ ni akere i.

¹⁸ Ama, minɛ bo ba de má labari kpa ni, ba ti má jɔɛ n wɔ, nzen sɛ a? Nahɔɛ, ba ti i. Dama ba kɛɛ i Nyɛmɛ Jɔɛ Kadasi n nu ka,

“Ba bo ndoori abara ayɛ durunya n kɛɛ nu,
na bu nɔaniɛ aju asiɛn n kɛɛ su.”

¹⁹ M koro ka m bisa bekun ka, Yisarelifom ni, ba si má? Ba si. Moyisi du mɔ seeri ka, Nyɛmɛ ɲa,

“M má am si kɔɛ fa kɔ minɛm bo bu ti má daanfɛ n
nahɔɛ su ni,
m má am fa yaa fa kɔ minɛm bo bu la má ɲɔnɔlɛ
n ɲu.”

²⁰ Na Esaya ayo ahoresi, na wɔ se bu ka, Nyɛmɛ ɲa,

“Haari minɛm bo bu yo niɛniɛ má m busu ni, m ma ba
ɲu m.

Na minEM bo bu yo bisa má m busu ni, ma bŌ bu nu afa m ŋu akere bu.”

²¹ Na Esaya akaaki ase fa kŌ YisarelifŌm su ka, NyEME ŋa, “Ale kERE bo i cin, m tenje m saa fere nyini minEM n wŌ, ama, bu ti atii kekereke ni ketemafŌm wŌ.”

11

Kabo NyEME ma YisarelifŌ nbem diiri i ahŌrŌma ni

¹ M koro ka m bisa ka, NyEME akete i minEM wŌ, nzEN sE a? Ai, wŌ kete má bu e. Am ti fEN. Mini PŌŌlu ni m tii, m ti YisarelifŌ Ō. M ti Abraham busu nufŌ Ō, m fite BENjamin dEE lEE anŌ n nu wŌ. ² NyEME akete má i minEM bo i du mŌ yiiri bu ni. Am nya kan má NyEME JŌRE Kadasi n nu fa kŌ i nŌaniE kanfŌ Eliya n su, kabo i jarakiiri YisarelifŌm NyEME dŌ n wŌ, nzEN sE? ³ Bo i ŋa, “MicERA, ba kun u nŌaniE kanfŌm kERE, ba kaaki afufu u yoowa yoobirim n kERE, wŌ kŌ aka mini ŋgumi kpein wŌ, ye bu koro ka bu kun m gusu n a.” ⁴ Ama, NyEME yo seeri i sE wŌ? I ŋa, “Ma yaki YisarelifŌm minE akpii nso afa ase Yisareli asiEN n su. BERE ye bu nya kutu má amŌE Baali n na bu su i a.” ⁵ Nyini dEE ti, kisa gusu, i ti sŌ Ō lEE. NyEME ayi YisarelifŌm nu minE kaan sŌ Ō, ye wŌ fere bu a, fa kŌ i ahŌrŌma n dEE ti. ⁶ I ahŌrŌma n dEE ti, ye wŌ yi bu a, má ka bu sayoowa dEE ti a. NzEN má i ti ka bu sayoowa n dEE ti, má ahŌrŌma n ti má aceeri kun.

⁷ Nzu bekun a? YisarelifŌm n anya má deke n bo bu kpiiri i busu ni, ama, minEM n bo NyEME yiiri bu ni, bERE nyaari i a, na bo bu kaari n kERE ahorembaa ayo kekereke.

⁸ I ti kabo ba kERE i NyEME JŌRE Kadasi n nu n wŌ, ka,
 “NyEME ama bu ahorembaa nŌnŌri,
 na i ma bu nyumbaa ŋu má asi,
 na i ma bu sui ti má asui,
 haari ni nyuma.”

⁹ Na FEMƐ Davidi ase ka,
 “Ma bu cƐƆnkpiri diire diibiri n kaaki toroku ni diɛndiɛ
 tara bu.

Ma bu kpaasi, na bu nya bu satiɛ ɲkatɔ.

¹⁰ Ma bu nyunu si biri na bu koro ɲu má asi,
 ma bu wi biri sanƆa kƐƐ sanƆa ka ba sɔ sɔɔri
 nɔnɔɔri wɔ.”

Kabo bo bu ti má YudaƆm n anya tiide ni

¹¹ M koro ka m bisa ka, bo bu boori bu jaa kpaasi ni,
 bu yasu má kun wɔ? Ai, má sɔ. Ama, nahɔƐ, bu kpaasi
 sɔ n dƐɛ ti, ye minƐm bo bu ti má YudaƆm nyaari tiide a,
 adena YudaƆm ɲu i na bu si bu kɔƐ. ¹² Nyini ti, ba kpaasi
 n dƐɛ ti, ye durunya n nufɔm anya deke kpa beberebe a,
 ba fun deke n bo má bu nya i n dƐɛ ti, ye bo bu ti má Yuda-
 Ɔm n anya deke kpa beberebe n a. Tɔ, nƐn i ti sɔ, na
 YudaƆm bo bu bá yo yarada n búka su, i yó deke kpa tara
 sɔ.

¹³ Kisa m sujɔɔ ambɛƐ bo am ti má YudaƆm ni gusu
 dɔ a. Juma n bo NyɛmƐ afa ama m ni, i sunmaari m ka m
 yo i jaramasa ambɛƐ bo am ti má YudaƆm dɔ ɔ, nyini
 ti ye m fa m juma n fa fɔ a, ¹⁴ na i má m tiɛɲgu minƐm si
 kɔƐ, adena bu nbem nya tiide. ¹⁵ Dama sanƆa bo NyɛmƐ
 keteeri bu ni, ye i ni durunya n nufɔm kƐƐ ayo kun a,
 ama, nƐn i kaaki deeru bu bekun, i tí sɛ wɔ? I yó ka ba
 nya ɲɔɔ afite yiwee nu wɔ lɛɛ. ¹⁶ NƐn be faari i alɛmbaa
 fɔfɔƐ be fa yoori yoowa na i fa maari NyɛmƐ, nyini la ka,
 i alɛmbaa n kƐƐ ti NyɛmƐ dƐɛ wɔ lɛɛ. Ye nƐn baka
 bunlui n ti NyɛmƐ dƐɛ, nyini la ka, i asambaa n kƐƐ gusu
 ti NyɛmƐ dƐɛ wɔ lɛɛ.

¹⁷ NahɔƐ, Yisarelifɔm ti ka baka n bo i su suuwa kpa
 n wɔ, ye ba kpiɛ i asambaa ni nbem atu, na ambɛƐ ti ka
 boro baka bo i suuwa la má fanƆa, ye ba kpiɛ am asa baka
 n bo i su suuwa kpa n dƐɛ asambaa n su a, nyini ti, am

ni baka n bo i su suuwa kpa n asambaa n kERE san̄ga nya ḡḡḡ fite i bunlui n dō ḡ. ¹⁸ NzEN i nya ti sō, má am fa fō ka am ti kpa tara baka n bo i su suuwa kpa n ni i tii, dama má asambaa ni ma bunlui ni ḡḡḡ a, ama, bunlui ni ma asambaa ni ḡḡḡ a.

¹⁹ Beni, a se ka, “Ba kpiE baka n bo i su suuwa n dEE asambaa n be, adena mini nya sasuubiri a.” ²⁰ Tō, i ti nahōRE wō, Yudafōm ayo má yarada n dEE ti, ye NyEME kpiEeri bu jiiri n a, ye u yarada n dEE ti, ye a jina jinaabiri n bo a jina n a. Nyini ti, má a yo kpirikoro, ama, si u ḡu sa. ²¹ Dama nzEN NyEME ayaki má baka kpa n ni i tii dEE asambaa ni, beni, i bá yaki má wōḡ boro baka ni mmōḡ dEE asambaa ni. ²² M ḡa a ḡu kabo NyEME yo sakpa barasu ni, ni kabo i di minE jōRE na i cin bu sui ni anyumboro barasu ni. MinEM bo bu yo má i yarada n ye i di bu jōRE cin bu sui ni anyumboro n a, ama, wōḡ yiri, i yo sakpa ma u wō, nyini ti, susu i sakpa n bo i yo ma u n su, má nyini, i kpíE wōḡ mmōḡ ji wō lEE. ²³ NzEN Yudafōm kaakiiri bu wo, na bu bá yoori NyEME yarada, i koro fa bu sa bu woobiri dawa n su, dama i la yiko bo i koro yo sō. ²⁴ Ti fEN. Wōḡ mmōḡ ni u tii ti ka boro baka asambaa n bo ba kpiE i afa asa baka n bo i su suuwa kpa n su wō. Nyini ti, a si ka NyEME dō, i ti má kekereke na i káaki ba fa baka n bo i su suuwa kpa n asambaam n ba sa bu woobiri dawa n su bekun.

Kabo NyEME si sōnō kERE aḡunfō n jōRE

²⁵ M ninbaam, asiri nu jōRE be yaa, ye m koro ka am si i a, adena má am yo am ḡu kpiri ka am la si. Yiri la ka, kabo Yisarelifōm nbem ayo bu ahorembaa kekereke ni, bu bíta i sō haari fa kō ju san̄ga bo minEM bo bu ti má Yudafōm kERE bá ba NyEME dō. ²⁶ Tō, i yó sō ḡ, na Yisarelifōm kERE bá nya tiide, kabo ba kERE i NyEME JōRE Kadasi n nu ni, ka,

“Tiidefō ni fíte Siyon miε kpiri n nu ba,
na i bá yi deke n kεRE bo i kŌ má atin su fa tu,
na i yó Jakōbu busu nufōm casi.

²⁷ Kabo m fá sεsεsu di i di ni bεRE lεε,
sanġa bo m ba yiiri satie n bo i wo bu ŋu ni.”

²⁸ Kabo Yudafōm n akete labari kpa n ni, nyini ma ba kaaki NyεME kpōfōm kisa n a, ambεRE bo am ti má Yudafōm n dεε ti. Ama, fa kŌ kabo NyεME fereeri bu nam na i yiiri bu ni, bu ti i minε koroowam wŌ. ²⁹ Dama nZEN NyεME faari i aceeri fa ceeri minε nbem, wara nZEN wŌ fere sŌnŌ, i kaaki má i sunsunni. ³⁰ AmbεRE, am yo keteeri NyεME nŌaniε n wŌ, ama, kisa, wŌ si am aŋunfō, bεRE bo ba kete i nŌaniε n dεε ti. ³¹ TŌ, kisa, i ti sŌ Ō, bεRE akete NyεME nŌaniε ni, dama NyεME asi am aŋunfō, adena i awieeri su, na i bá si bεRE gusu aŋunfō. ³² Dama NyεME abo sŌnŌ kεRE kun ka bu kεRE kete i wŌ, adena i awieeri su na i bá si bu kεRE aŋunfō.

NyεME kansi jŌRE

³³ NahŌRE, NyεME alecira ni i si bo i la i n wo ŋgo. Kabo i di i jŌRE ni, be koro fiiti má nu na i ti i bu, i atin n gusu kεRE, sŌnŌ koro si má i bu. ³⁴ Ba kεRE i NyεME JŌRE Kadasi n nu ka,

“Ŋma nya si deke bo i wo MicEra n sunsunni nu a?
Wara ŋma nya koro tu i fŌ a?”

³⁵ “Ŋma nya ce NyεME deke be a,
adena NyεME kaaki tŌ i mi kaari a?”

³⁶ Dama deke kεRE fite yiri dŌ a, deke kεRE ti i dεε wŌ, na deke kεRE bá yo i dεε wŌ. Yiri ti ye ni ka ya kansi i sanġa kεRE sanġa. Ami.

12

Minεm bo bu yo NyεME sa koroowa n woowa jŌRE

¹ Nyini ti, m ninbaam, m sere am wɔ, am niɛ kabo Nyɛmɛ asi am aɲunfɔ ayo am sakpa ni, na am fa am ɲu ma i, kabo má am yo yoowa fa ma i ni, ama, am toko la ɲɔɔ, na am kaaki Nyɛmɛ minɛm na am su i ni anyumboro. Nyini ti nyɛmɛsu bo i sun i nu a, dama wɔ yo sakpa ama am. ² Má am ma am woowa ti kabo durunya n nufom woowa ti barasu ni, ama, am kaaki am sunsunni fɔfɔrɛ, na am kaaki am wo, nyini ma am koro si Nyɛmɛ koroyanu sa a, bo i ti kpa, na i sun i nu, na i ti kabo i koro ka i ti ni.

³ Tɔ, Nyɛmɛ aceeri n bo wɔ fa ama m dɛɛ ti, m sutu am kɛrɛ fɔ ɔ ka, má be wura i ɲu kpiri tara kabo i ti ni, ama, sɔnɔ kɛrɛ sunsun na i niɛ i ɲu kabo i ti nahɔrɛ su barasu, na i si kabo Nyɛmɛ ama i mi yarada barasu ni. ⁴ Adamande aɲuniɛmbaa n ti mɔmɔ kun wɔ, ama, i la bue bue, i kɛrɛ ni i juma bo i yo i. ⁵ Ya gusu dɔ i ti sɔ ɔ lɛɛ, ya sunnu, ama, ya ni Kristo ayo kun n dɛɛ ti, ya ti aɲuniɛmbaa mɔmɔ kun wɔ, na ya kɛrɛ ti aɲuniɛmbaa n bue be bo ya buka ya beɲgu wɔ. ⁶ Nyini ti, aceeri barasu barasum bo Nyɛmɛ ahɔrɔma n dɛɛ ti na wɔ fa ama ya ni, am ma ya fa yo i juma ni. Nzɛn aceeri n bo Nyɛmɛ afa ama be n la ka i sukan Nyɛmɛ nɔaniɛ ni, i ti ye ni ka i mi sufa yo juma, kabo i yarada n ti barasu ni. ⁷ Nzɛn Nyɛmɛ ama be aceeri ka i su amusui, i ti ye ni ka i mi sufa su. Nzɛn wɔ ma be aceeri ka i fa kere minɛm, i ti ye ni ka i mi sufa kere bu. ⁸ Nzɛn wɔ ma be aceeri ka i sutu minɛm fɔ na i wura bu kpɛkpɛrɛ kekereke, i ti ye ni ka i mi sutu fɔ yo sɔ. Nzɛn wɔ ma be aceeri ka i suyo sakpa na i ce minɛm aceeri, i ti ye ni ka i mi yo i ni ahorembaa kun. Nzɛn wɔ ma be aceeri ka i yo minɛm mɔfɔ, i ti ye ni ka i yo sɔ ni anyumboro. Ye nzɛn wɔ ma be aceeri ka i suyo sakpa ma minɛm bo bu wo ahoresaaki nu ni, i ti ye ni ka i yo sɔ ni ahorejɔ.

⁹ Am koro minɛm ni akunnu fofoe, am kpɔ satie, na

am su deke bo i ti kpa su. ¹⁰ Am koro am beɲgu Kristofom ka am ti nibaam wɔ, na am bu am beɲgum ka bu tara am.

¹¹ Am su Mibiε n ni anyumboro, má am yo nviεya, am ma am ahorembaa bi ni nyεmεsu. ¹² Am la ahoresi n dεε ti, am ma am ahore jɔ. Saɲga kεε bo am sudi wahara,

am mindi, na am sere Nyεmε saɲga kεε ni anyumboro.

¹³ Am kpaaki am neɲgem nu ma Nyεmε minεm bo bu la má be ni, na am boro am nyi sude minεm wɔfɔ.

¹⁴ Am sere deke kpa Nyεmε dɔ ma minεm bo bu kere am wuwuruwa ni, am sere deke kpa ma bu, má am sere deke tiε ma bu. ¹⁵ Nzεn minεm wo ahorejɔ nu, am ma am ni bεε kεε ahore ti jɔɔwa. Nzεn minεm wo ahoresaaki nu, am ma am ni bεε kεε wo ahoresaaki nu. ¹⁶ Am ma am ni am beɲgum saɲga wo ni sawɔre, má am koro kpiri, ama, am fa am ɲu mata tarakam. Má am se ka ambεε ɲgumi la ɲgɔnlε a.

¹⁷ Nzεn sɔnɔ yo am satie, má am wɔɔ tiε tɔ i kaari. Ama, am boro am nyi na am suyo sa bo i ti kpa, na sɔnɔ kεε ɲu i, na bu se ka i ti kpa. ¹⁸ Nzεn am koro yo i, am boro am nyi na am ni sɔnɔ kεε tana ni laifie. ¹⁹ M danfo kpam, nzεn be ayo am satie, má am wɔɔ tiε tɔ i kaari, ama, am yaki i, na Nyεmε cín i mi sui, dama ba kεε i Nyεmε jɔre Kadasi n nu ka, Micεra n ɲa, “Mini cín bu sui a, mini tɔ́ bu kaari a.” ²⁰ Ama, am yo kabo ba kεε i Nyεmε jɔre Kadasi n nu ni, ka, “Nzεn ahɔε ati u kpɔfɔ na a la diire, ma i na i di. Nzεn nzuehɔε ati i, ma i nzue na i nu. Nzεn a yoori sɔ, i ti ka a tɔɔ sinmɔne agɔ i mi tii su wɔ lεε.” ²¹ Má a ma satie yoowa kunma u, ama, ma u kpayo n kunma satie ni.

13

Kabo i ti ye ni ka ya de tereterefom nɔaniε barasu ni

¹ I ti ye ni ka sŏnŏ kɛrɛ de tereterefŏm nŏaniɛ, bɛrɛ bo bu la yiko na bu niɛ am su ni, dama yiko be wo má bɛrɛ bo i fite má Nyɛmɛ dŏ. Bo bu la yiko kisa n kɛrɛ, Nyɛmɛ akpama bu a. ² Nyini ti, sŏnŏ kɛrɛ bo i keteeri tereterefŏm nŏaniɛ ni, i mi sukete deke bo Nyɛmɛ akpama i n wŏ lɛɛ. Sŏnŏ kɛrɛ bo i yoori sŏ, i sukpini suicin ma i ŋu wŏ lɛɛ. ³ Dama sŏnŏ kɛrɛ bo i yo sakpa soro má tereterefŏm ni sɛrɛ, ama, sŏnŏ kɛrɛ bo i yoori satiɛ ni, yiri soro tereterefŏm n a. Nyini ti, nɛn a koro má ka a soro tereterefŏm ni, yo sakpa, na bu kansu u. ⁴ Nyɛmɛ ma tereterefŏm wo bɛrɛ yo bu juma a, na bu buka u na a yo sakpa. Ama, nɛn a yoori satiɛ, ma sɛrɛ ti u, dama Nyɛmɛ ama bu yiko ka bu yo bu juma ma yiri Nyɛmɛ a, na bu cin minɛm bo bu yo satiɛ n sui. Bu cin má minɛm sui ŋgbɛɛnŋgbɛɛn. ⁵ Nyini dɛɛ ti, i ti ye ni ka am de tereterefŏm n nŏaniɛ, má ka am soro ka bu cin am sui n ŋgumi dɛɛ ti a, ama, am ahore su, ni am sunsunni kere ka am yo sŏ n dɛɛ ti a. ⁶ Nyini dɛɛ ti, i kaaki ti ye ni ka am tŏ am lampom, dama gominam n yo bu juma ni anyumboro wŏ, Nyɛmɛ akere ka bu yo sŏ a. ⁷ Nyini ti, deke bo i ti ye ni ka am yo ma sŏnŏ kɛrɛ ni, am yo ma bu. Am tŏ am lampom kaari, wara nɛn ba kpɛ am kaari be, am tŏ i, sŏnŏ kɛrɛ gusu bo i ti ye ni ka am ma i jirima, am ma i.

Kabo i ti ye ni ka ya yo fa kŏ ya bengum n dŏ ni

⁸ Má am ma be deke be kaari su am su. Deke bo wŏ yo daka ka am bita am bengu kaari la ka, am sukoro am bengu. Dama sŏnŏ bo i koro i bengu, i mi su Nyɛmɛ nŏaniɛ kpamaawa n kɛrɛ su wŏ lɛɛ. ⁹ Dama am si Nyɛmɛ nŏaniɛ maawam n kɛrɛ, ka, “Má a saaki ajaa ciire, má a kun sŏnŏ, má a wŏ,” ni bo i ŋa, “Má a ma u konviki wura be dɛɛ nenje nu,” haari ni bo ba ka n kɛrɛ jina nyini nŏaniɛ kun ni su a, ka, “Koro u bengu kabo a koro u ŋu

ni.” ¹⁰ Sɔnɔ kɛɛ bo i koro i benggu yo má i mi satie. Nyini kere ka nɔaniɛ kpamaawa n kɛɛ jina koro su wɔ lɛɛ.

Minɛm bo bu wo wein nu n jɔɛ

¹¹ I ti ye ni ka am yo sɔ, dama am si kabo ahin saŋga n ti ni. Saŋga n aju, i ti ye ni ka am tenge, má am daafi. Dama saŋga n bo ya nyá tiide n adodo, i waari má ka saŋga bo ya du mɔ yoori yarada ni. ¹² Wɔ ka kaan na ya fite kɔŋguɛ nu, ale sucin lɛɛ. Nyini ti, am ma ya yaki awosin nu juma kɛɛ, na ya yo wein sayoowa, kabo luekunfom sana bu biɛsɔya nɛngem na bu kɔ kun lue ni. ¹³ Ya wo wiɛsu wɔ lɛɛ, nyini ti, am ma ya woowa kɔ atin su. Má ya sudi ya tii, sunu nzan subo, suyo ŋgbɛɛnŋgbɛɛn, má ya suyo sakaraya, suyo konvikiya ŋgbɛɛnŋgbɛɛn, má ya sukpini jɔɛ, na má ya susi kɔɛ. ¹⁴ Ama, am ma ya fa ya Mibiɛ Yesu Kristo n yo deke bo ya fa wura, kabo sɔnɔ fa sutura wura barasu ni, na má ya su ya ŋuniɛmbaa koroowa n su.

14

Má a jaraki u benggu

¹ Am de minɛm bo bu yarada ti má biiwa n ni am saa nnyɔ, má am se bu akuruwa fa kɔ deke n bo bu ci bu n su na am tanda bu ahore. ² Ma ya fa i ka, nbem la yarada bo bu koro di deke kɛɛ bo bu koro, ama, nbem gusu wo bɛɛ, bu yarada ti má biiwa, bu ciire la niɛ, bu di toro nyawa n ŋgumi wɔ. ³ Sɔnɔ bo i di niɛ kɛɛ niɛ ni, má i mi bu bo i di má niɛ ni ŋgbɛɛn. Sɔnɔ kɛɛ gusu bo i di nyawa n ŋgumi ni, má i mi jaraki bo i ci má pui ni, dama Nyɛmɛ ade i a. ⁴ Wɔrɔ la ŋma na a jaraki be dɛɛ gbɛfɛnɛ? I dɛɛ tiɛŋgu mibiɛ ni sé ka i jína wara i kpáasi a. I ti nahɔɛ wɔ ka i jína a, dama i mibiɛ ni koro ma i jina nyunyumi a.

⁵ Bekun, minɛ nbem dɔ, bu sunsun ka cɛɛn nbem ti kpa tara nbem, ama, nbem gusu sunsun ka cɛɛn n kɛɛ

ti kun wo, be tara má i beŋgu. I ti ye ni ka sɔnɔ kɛɛ su kabo i sunsunni nu kere ka i ti kpa n su. ⁶ Sɔnɔ kɛɛ bo i sunsun ka cɛɛn be ti kpa tara cɛɛn nbem ni, i mi koro ka i bu Nyɛmɛ dɛɛ ti, ye i yo sɔ a, ye sɔnɔ kɛɛ bo i ci má pui n gusu, i mi koro ka i bu Nyɛmɛ dɛɛ ti, ye i yo sɔ a, dama i da Nyɛmɛ asi fa kɔ diire n su, ye i nya di a. Sɔnɔ kɛɛ gusu bo i di má deke nbem ni, i mi gusu bu Nyɛmɛ dɛɛ ti, ye i yo sɔ a, dama i mi gusu da Nyɛmɛ asi fa kɔ diire n su, ye i nya di a. ⁷ Sɔnɔ be wo má bɛɛ bo i koro se ka i wo i tii su wo wo, be gusu wo má bɛɛ bo i koro se ka i wu i tii su yiwee. ⁸ Ai, nzɛn ya la ŋɔɔ a, Mibiɛ n dɛɛ ti ye ya la ŋɔɔ a. Nzɛn ya wu gusu a, Mibiɛ n dɛɛ ti ye ya wu a. Nyini ti, nzɛn ya la ŋɔɔ wara ya wu wo, Mibiɛ n dɛɛ la ya a. ⁹ Dama nyini dɛɛ ti ma Kristo wuuri, ye i tengeeri i yiwee n nu n a, adena i yó sɔnɔ kɛɛ Mibiɛ, bo bu la ŋɔɔ n ni bo ba du mɔ awu n kɛɛ. ¹⁰ Wɔɔ la ŋma, wɔɔ bo a jaraki u beŋgu na a bu i ŋgbɛɛn ni? A si má ka ya kɛɛ bá jina Nyɛmɛ nyunu na i dí ya jɔɛ? ¹¹ Kabo ba kɛɛ i Nyɛmɛ Jɔɛ Kadasi n nu ni, ka, Micɛra n ŋa, “Sɔnɔ kɛɛ bá kutu m nyunu, na sɔnɔ kɛɛ bá teke i nɔɔ se ka mini ti Nyɛmɛ a. Kabo ma se ni, nyini wo bɛɛ a.”

¹² Nyini ti, ya kɛɛ bá kan ya sa bo ya yo i n kɛɛ kere Nyɛmɛ.

Má a yo sa bo i ma u beŋgu Kristofɔ bo i jaa na i kpaasi

¹³ Nyini ti, am ma ya yaki ya beŋgum jɔɛ kan, na má ya jaraki bu kun, ama, am ma ya sunsun kabo ya yo na má ya ma ya beŋgu Kristofom bo bu jaa, wara na bu kpaasi. ¹⁴ Kabo m ni ya Mibiɛ Yesu ayo kun ni, nyini ma m si ka deke be mmɔɔ ni i tii ti má ciire n a. Ama, nzɛn sɔnɔ sunsun ka deke be ti ciire i dɔ, má i mi di i. ¹⁵ Nzɛn diire n bo a di i n dɛɛ ti, na a saaki u beŋgu Kristofɔ n ahore, nyini yiri, a suyo má koro sa lɛɛ. Kristo yo wuuri i dɛɛ

ti wɔ, má a ma i mi ka ngbɛɛn, u diire n bo a di i n dɛɛ ti. ¹⁶ Má am ma be jɔjɔ jɔɛ tiɛ fa kɔ deke kpa n bo am si i n su. ¹⁷ Dama kabo Nyɛmɛ niɛ i minɛm su ni, i ti má di ni nu jɔɛ wɔ, ama, i ti aceeri bo Awiewiɛ Casi n afa ama minɛm wɔ, yiri la ka, ya yo sa bo i kɔ atin su Nyɛmɛ dɔ, ni tanalaifiɛ, ni ahorejɔ. ¹⁸ Sɔnɔ kɛɛ bo i suuri nyini atin n su, na i su Kristo sɔ, i mi yo sa bo i sun Nyɛmɛ nu a, na adamande kansi i ka i ti sɔnɔ kpa.

¹⁹ Nyini ti, am ma ya boro ya nyi na ya su deke n bo i ma ya tanalaifiɛ n su, na ya buka ya bɛngum, na ya kɔ mɔ ni ya nyɛmɛsu ni. ²⁰ Má am saaki Nyɛmɛ juma ni, diire dɛɛ ti. Diire kɛɛ ti kpa a. Ama, nzɛn be di diire be na i ma i bɛngu bo i jaa na i kpaasi, nyini yiri, i ti má kpa. ²¹ Nzɛn a di niɛ, wara a nu nzan, wara a yo nyini n be sɔ, na i ma u bɛngu Kristofɔ bo i jaa na i kpaasi, i ti má ye ni ka a yo sɔ. ²² Yarada n bo a yo i u ahore su fa kɔ nyini jɔɛm su, ma i wo u ni u Nyɛmɛ afiɛn. Sɔnɔ kɛɛ bo i yo sa bo i kɔ atin su, na i la má sika i ahore su ka wɔ yo satie, i mi la terefiɛ nahɔɛ su. ²³ Ama, sɔnɔ kɛɛ bo i ba sudi diire barasu nbem na i yo sika, Nyɛmɛ adi i mi jɔɛ ajaraki i ka wɔ yo satie, dama diire n bo i sudi i ni, wɔ yo má yarada. Deke kɛɛ gusu bo sɔnɔ yo i, na i la má yarada, i ti satie wɔ Nyɛmɛ dɔ.

15

Ya yo sa bo ijɔ ya bɛngum ahore

¹ Yɛɛ bo ya la fanɔa fa kɔ yarada su ni, wɔ yo daka ka ya yo sawɔɛ ni bɛɛ n bo bu yarada la má fanɔa ni, na ya buka bu, na ya dada bu ahore, má ya yo sa bo i sun yɛɛ ni ya tii nu. ² Sɔnɔ kɛɛ yo deke bo i sun i bɛngu nu, na i yo sakpa, na i kɔ mɔ ni i nyɛmɛsu ni. ³ Dama haari Yesu Kristo ni i tii ayo má sa bo i sun yiri ni i tii nu, ama, i ti kabo ba kɛɛ i Nyɛmɛ Jɔɛ Kadasi n nu n wɔ,

ka, “Nzukɔlɛɛ barasu n kɛɛ bo minɛm fa kpɛɛɛri wɔɔ Nyɛmɛ ni, bu fa kpɛɛɛri mini wɔ.” ⁴ Deke n kɛɛ bo bu du mɔ kɛɛɛri i Nyɛmɛ Jɔɛ Kadasi n nu ni, bu kɛɛɛri i ka i kere ya a, adena ya la tama, dama deke bo ba kɛɛ i ni, nyini ma ya ahoresi a, na ya koro mindi a. ⁵ Nyɛmɛ ma ya mindi ni ahoresi a, yiri ma am la anɔɔsɛ ni am bɛngɔ a, kabo Yesu Kristo kereeri am ni, ⁶ adena am kɛɛ tiɛn am nɔɔ fa anɔɔsɛ, na am kansɛ Nyɛmɛ, ya Mibiɛ Yesu Kristo Si.

Kabo minɛm bo bu ti má Yudafɔm gusu ade Kristo labari kpa n ni

⁷ Nyini dɛɛ ti, am de am bɛngum, ni am saa nnyɔ kabo Kristo ade am ni, nyini ma minɛ kansɛ Nyɛmɛ a. ⁸ Dama m suse am ka Kristo baari ka i ba buka Yudafɔm n wɔ, i yoori sɔ n dɛɛ ti, nyini ma deke n bo Nyɛmɛ seeri ka i yo ma Yudafɔm nam n ayo biiwa nahɔɛ su n a. ⁹ Bekun i baari ka i ba buka minɛm bo bu ti má Yudafɔm wɔ, na bu gusu kansɛ Nyɛmɛ fa kɔ kabo wɔ si bu aɗunfɔ ni. Kabo ba kɛɛ i Nyɛmɛ Jɔɛ Kadasi n nu ni, ka,

“Nyini dɛɛ ti, m kánsɛ wɔɔ Nyɛmɛ,
m kánsɛ u duma minɛm bo bu ti má Yudafɔm nu,
na m dí jue ma u.”

¹⁰ Ba kaaki akɛɛ i bekun ka,
“Ambɛɛ bo am ti má Yudafɔm ni,
am ma am ahore jɔ ni Nyɛmɛ minɛm bo wɔ yi
bu ni.”

¹¹ Bekun, i ɗa,
“Ambɛɛ bo am ti má Yudafɔm ni, am kansɛ Micɛra ni,
na am ma daanfɛm kɛɛ kansɛ Nyɛmɛ.”

¹² Na Nyɛmɛ nɔɔaniɛ kanfɔ Esaya gusu ase ka,
“Sɔnɔ be bá fite Jese dɛɛ lɛɛ anɔ n nu,
i ti kabo baka tiɛ i bunlui su n wɔ,
na i bá yo daanfɛm kɛɛ fɛmɛ,
yiri má bu nya ahoresi a.”

¹³ Nyεmε ma ya tama, m sere i ka i ma am ahorejɔ ni tanalaifiε kɔ sin su, kabo am ayo i yarada n dεε ti, adena Awiεwiε Casi n yiko ma am tama bo i la má aɲusu.

Deke bo i ti na Pɔɔlu kεrεεri ahin kadasi n ni

¹⁴ Tɔ, m ninbaam, m si tenle su ka am la wo kpa, na am la si dɔɲgu, na am kaaki koro fa tu am beɲgu fɔ.

¹⁵ Haari ni nyini mmɔɔ, ma fa ahoresi, ye m sukεrε ahin kadasi n fa ma am a, adena m tenge am ahin sam n su, dama Nyεmε ayo sakpa ama m, ¹⁶ ka m yo Yesu Kristo amusuisufɔ ma minεm bo bu ti má Yudafɔm ni, adena m kan Nyεmε labari kpa n kere bεrε bo bu ti má Yudafɔm ni, na Awiεwiε Casi n ma Nyεmε de bu ka bu ti i dεε mine casim. M yoori sɔ ni, i ti ka Nyεmε sayoowa dɔɲguyofɔ n bo i yo yoowa bo i sun Nyεmε nu ni. ¹⁷ Yesu Kristo dεε ti, m la atin bo m koro fɔ fa kɔ Nyεmε juma n bo wɔ fa ama m su. ¹⁸ Nahɔrε, i la m sεrε na m kan sam bo nyingam ayo bu ni, má ka sam n bo Kristo ma ma yo bu ni ɲgumi, yiri la bo wɔ ma ma kan i nɔaniε n akere minεm bo bu ti má Yudafɔm ni, na ma yo alekutura sam, na ba de i nɔaniε ni. ¹⁹ I ma m faari alekutura sam, ni Awiεwiε Casi n dεε yiko nu fa yoori nyini juma n a. M boori i bu Yεrusalem miε kpiri n nu wɔ, na ma bara ayε akɔ aju haari Ilirikum awɔrε n nu, na ma kan Kristo labari kpa n jɔrε n kεrε akere bu. ²⁰ Deke bo m nyunu boro su agaya n la ka, m kan labari kpa n jɔrε kere minεm awɔrεm n kεrε bo bu nya ti má Kristo duma ni, dama m koro má ka m ta be dεε ataari su, ²¹ kabo ba kεrε i Nyεmε Jɔrε Kadasi n nu ni, ka, “Haari ni bo minεm nya kan má labari kpa n kere má bu ni,
bu ɲú i,
haari ni bo bu nya ti má labari kpa ni,
bu tí i, na bu sí i bu.”

Kabo Pɔɔlu ɲa i koro ka i kɔ niε Romafɔm busu ni

²² TŌ, nyini n kERE dEE ti, sanġa kERE, má m koro ka m ba niE am busu wŌ, ama, m nya má atin. ²³ Ama, kisa, miE ƒŌƒŌRE be wo má bERE bo m kŌ dŌ na m kŌ yo juma ahin awŌREM n nu, nyini ti, kabo má sanġa kERE na m koro ka m ba niE am busu ni, ²⁴ m la tama ka m ba susin kŌ Esipani dEE awŌRE n nu, m jína am dŌ na m niE am busu, na m ni ambERE nya tana, na am buka m na m koro kŌ ju deke bo m sukŌ ni. ²⁵ Ama, kisa yiri, m sukŌ YERusalem miE kpiri n nu wŌ, m la buka be bo m kŌ fa ma NYEME minEM bo bu wo dŌ ni. ²⁶ Dama KristofŌm bo bu wo MakEdoniya ni, ni bo bu wo Akaya dEE awŌREM n nu ni, wŌ yo bu fiE ka bu yi yi ŋwaa, na m kŌ fa ma NYEME minEM bo bu wo YERusalem na bu ti yaarifŌm ni. ²⁷ BERE ni bu tii afa sunsunni kpa aŋu ka YERusalemfŌm kaari su bu su, dama YERusalemfŌm du mŌ faari NYEME deke kpa maari bERE n bo bu ti má YudafŌm n wŌ, nyini dEE ti, wŌ yo daka ka bERE gusu nya durunya n nu neŋge ma YERusalemfŌm ni. ²⁸ TŌ, nyini ti, nZEN m koro yoori nyini juma n kERE wieeri, na bu nya nyini buka n kERE, m bá niE am busu, na m nyá sin kŌ Esipani. ²⁹ M si tenle su ka m baari, m fá deke kpa fite Kristo dŌ ba ma am.

³⁰ M ninbaam, kabo Ya MibiE Yesu Kristo wo ya dŌ, na AwiEwiE Casi n koro ya agaya n dEE ti, m sere am wŌ, ka am buka m na ya sere NYEME ni anyumbo, ³¹ ka i dé m fite Yudiya awŌRE n nufŌ nbem bo bu yo má yarada n saa nu, na NYEME minEM bo bu wo YERusalem n dé buka n bo m sufa kŌ ma bu ni. ³² Na nZEN i ti NYEME koroowa, na m bá am dŌ ni ahorejŌ, na m ni ambERE kERE koro dada ya beŋgu ahore. ³³ NYEME bo i ma tanalaifiE n buka ya kERE. Ami.

16

Kabo PŌŌlu yoori Kristo jamam bo bu wo Roma miE

kpiri n nu ansE ni

¹ To, m koro ka am si ya niwa baabara n bo bu fere i ka Fibi ni, i yo NyEME juma buka Kristo jama n bo i wo Kenciriya miE kpiri n nu n wo. ² Am de i kabo ma am de NyEME minEM barasu ni, MibiE n dEE ti, na am buka i ni deke kERE bo i koro, dama yiri ni i tii abuka minE dongu, haari ni mini mmoo.

³ Am bisa Pirisila ni Akuyila dongu ma m. M ni bERE sangya yo juma ma Yesu Kristo wo. ⁴ Bu yo toori bu ngoo maari m wo, nyini dEE ti ye m da bu asi n a, ma mini ngumi yo bu ansE a, ama, Kristo jamam kERE bo bu ti ma Yudafom gusu yo bu ansE. ⁵ Am bisa Kristo jama n kERE dongu, bo bu tien bu noo bu dika ni.

Am bisa m danfo kpa Epanetosi n dongu ma m, yiri du mo yoori Kristo yarada Esiya dEE awore n kERE nu a. ⁶ Am bisa Mariya dongu, bo wo yo juma agaya abuka am ni. ⁷ Am bisa Andoronikusi ni Juniya dongu, m lamoko Yudafom bo m ni bERE yo woori dansaraka nu ni, bu la dumaye Kristo jaramasam kERE nu, bERE du mo yoori Kristo susufom ka, ye m nya ba yoori a. ⁸ Am bisa m danfo Ampiliyatusi dongu, m MibiE n dEE ti, m koro i agaya. ⁹ Am bisa Wuribanisi dongu ma m, bo yiri ni yERE sangya yo juma ma Kristo ni, na am kaaki bisa m danfo Sitakisi dongu. ¹⁰ Am bisa Apelesi dongu, bo wo yi i nu ka i ti Kristo susufo nahore su ni, na am bisa Arisitobulosi dikafom kERE dongu. ¹¹ Am bisa m lamoko Yudafom n bo bu fere i ka Herodiyon n dongu, na am bisa Naracisi dikafom bo bu ti MibiE n dEE minEM n buka su. ¹² Am bisa Tirifena ni Tirifosa dongu, nbara nnyom bo bu yo juma ma MibiE ni, ni m danfo PERisisi, yiri mmoo ayo juma agaya ama MibiE n ni. ¹³ Am bisa Rufusu dongu, yiri bo NyEME ayi i ka i yo i juma n ni, ni i ni bo i ti mini mmoo ni ni. ¹⁴ Am bisa ahin minEM kERE dongu

ma m, bERE la Asinkiritusi, ni Felegon, ni HEREmesi, ni Patorobasi, ni HEREmasi, ni ya ninbaam kERE bo bu wo bu do ni. ¹⁵ Am bisa Filolokusi ni Juliya dongu, ni NEREyusi, ni i niEmabara ni, ni Olimpasi, ni NYEME minEM kERE bo bu wo bu do ni. ¹⁶ Am bisa am benju dongu ni koro. Kristo jamam kERE bo bu wo fen n bisa am dongu.

Awieeri su dEE fotuuwa

¹⁷ M ninbaam, m sere am wo, am si am nu sa ni minEM bo bu saaki kereewam bo am adu mo ade i ni, na bu fa kpakpaakinu ba ni, na bu ma minEM kpaasi fa ko bu yarada n su ni. Ma am dodo bu. ¹⁸ Dama nyini minEM so, bu su ma ya MibiE Yesu Kristo su, ama, bu su bu dEE kunnu koroowa su wo, na bu bo minEM bo bu si ma pui n anofie, na bu dadaka bu. ¹⁹ Ama, ambERE yiri, sono kERE ati kabo am ade Kristo noniE nahore, nyini dEE ti, m ahore ajo ako asin su. M koro ka am la si fa ko deke n bo i ti kpa n su, ama, m koro ma ka am la si haari kaan so mmoo fa ko deke n bo i ti ma kpa n su. ²⁰ NYEME bo i ma tanalaifie ni, i ce ma, i ma am yiko na am fun tiEntien Sitana nu mereki i. Ya MibiE Yesu Kristo buka am.

²¹ Timoti bo m ni yiri sangga yo juma n bisa am dongu, na Lukiyosi, ni Jason, ni Sosipateri, m lamoko Yudafo m gusu bisa am dongu.

²² Mini Teretiyusi gusu bisa am kERE dongu, MibiE n dEE duma n nu, mini ye Poo lu ma m kEREERI ahin kadasi n sufa ma am n a.

²³ M awurufobie Gayosi bisa am dongu. Kristo jama n kERE tien bu noo i dika a. Irasitusi bo i ti mie n nu nwaa bitafon ni, ni ya niwa Kuwatosi kERE bisa am dongu. [²⁴ Ya MibiE Yesu Kristo buka am kERE. Ami.]

Poo lu dEE awieeri su noniE ni

²⁵ Am ma ya kansi NyεMε. Yiri koro ma am jina fanƙa kenken fa kƆ Yesu Kristo labari kpa n bo m kaanri i jƆRE na am ati i n su a. I ti jƆRE bo bu yo fa fiεeri dada kERE wƆ, ama, kisa wƆ fite fofoe nu. ²⁶ Yiri ye NyεMε nƆaniε kanfom kEREeri i n a, na NyεMε bo i wo bERE sanƙa kERE n ama daanfiε kERE ati i, na ba de i, na ba yo i yarada. ²⁷ NyεMε ηgumi la alecira a, yiri ti ye ni ka ya kansi i a, Yesu Kristo dεε ti, sanƙa kERE sanƙa. Ami.

Nyeme Jore Kadas
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 14 Jun 2022 from source files dated 21 May 2021

fe36d0e6-2a60-5e15-8d1c-8bf275389598